



ル 5  
3252  
9





門 几 5  
號 3252  
卷 9

昭和十七年  
五月二十一日  
購求



廣東考古輯要卷四十

人物二

宋

黃正字仲通曲江人少勤學家本寒素刺史潘夙見之曰此奇童也及冠以詞賦知名場屋間天聖初進士累官至屯田員外郎監司以勞聞歎曰鐘鳴漏盡而不知止者滔滔皆是也吾年六十八可以已矣遂休官凡六年卒

余靖字安道韶州曲江人少不事羈檢以文學稱鄉里舉進士天聖二年起家為贛縣尉累官至工部尚書三使契丹未嘗辱命習外國語嘗為番語詩御史王平等劾其失使者體卒年六十五謚襄靖

王式字用之曲江人唐宰相珪之後十四而孤耿介自立以學



行稱天聖初進士出知梅州卒於官子陶字子元博學有俊才登天聖王堯臣榜進士第陶子履古亦進士曲江稱三世進士第惟王氏鄧氏而已

鄧戡韶州曲江乳源人博通經學登天聖五年第累官殿中丞子堂登皇祐間進士第堂子弼亮亦進士三世登科有聲南

譚必字子思樂昌人六歲通經天聖間中丞王益出守韶州時嶺表自五季兵革之後文風凋喪人鮮知學王荆公喜其聰慧日誦萬言遂狀其事以聞必應童子舉日誦萬言稱旨後登慶厯中進士調邕州推官時儂智高作亂必堅壘以禦日久食盡援兵不至城陷被執遇害

李訪曲江人善事父母父卒勺水不入口者七日母繼卒亦如

之廬於墓下虎來墓傍馴視而不傷人又有白鳥集廬側州以事聞仁宗旌其門閭

張持字久中初名伯虎曲江人幼孤養於兄嫂嘗曰嫂之撫吾猶母也慶厯中以博學善文詞入太學學官歲薦獻士二人伯虎與焉乃更名後二年卒曾鞏志其墓

石汝礪英德人號碧落子少穎敏讀書過目成誦自以生長嶺嶠局於聞見乃踰嶺而之江西從聞人遊久而有得五經多有講說於易尤契微妙蘇軾謫惠州遇之聖壽寺軾嘗題南山石壁云蜀人蘇子瞻南遷惠州巖下與幼子過同遊聖壽寺遇隱者石汝礪與之談易又談羅浮之勝至暮乃去鄭總字青叟生平達性命了死生齊物我東坡贈詩云年來萬事足所少惟一死澹然兩無求滑靜空棐几



李渤字子文樂昌人世業儒有聲嶺表性至孝與弟巖事母張氏惟謹登嘉祐進士郡人尊之號爲李夫子嘗試南昌作聞伯夷之風頌夫廉賦中魁時人膾炙稱爲李伯夷有詩云嶺北嘗聞夫子號江西曾振伯夷風巖字子章渤知白州巖知象州

劉曄韶州翁源人進士洽聞博學崇寧中置廣南東路提舉學事司掌州縣學政歲巡所部以察師儒優劣生員勤惰而專舉刺之任以曄爲之其教士子立課程懸賞罰責實行崇信讓雖鄉曲一無所私自是人才輩出

侯晉升字德昭曲江人登元豐進士爲程鄉令與蘇軾兄弟往還款密家藏二公墨帖甚富軾一帖云蒙示新論利害炳然文亦溫麗歎伏不已但恨罪廢之餘不能少有發明爾

李南仲英州潁陽人少穎悟日記數千言十歲舉神童遂中童子科元豐以後賜出身者五人南仲其一也授從事郎歸省自以學未大成邀於羅浮誦讀不輟後知康州以治行聞蕭雄字安道本吉州人僑寓樂昌父業農兄雅字安正弟維字安國俱起自白屋連擢高第時稱蕭氏三合君

鄧孝廉字清臣曲江人登建炎進士官至德慶府卒中書舍人朱翌銘其墓曰急人之急傾篋倒笥仁柔義剛如漢名吏蓋實錄也

胡彥忠曲江人五世同居慶元中經幹吳豐假宿其家深加獎歎贈以詩云古羊人物舜風餘百世傳來只舊廬爲愛一門能守義相承五世不分居言於臺閭以狀聞詔旌其門

古成之字亞奭本惠州河源人五季末避地增城結廬羅浮山



力學不怠淹貫羣籍文譽動四方宋初干戈甫息嶺嶠文風未振每取一士合一路以一人薦眾推成之太宗雍熙改元充秋賦督府勸駕詩云寰中有道逢千載嶺外觀光只一人蓋紀實也明年上春官有司奏以梁灝第一成之第二預傳聞焉有張賀劉師道者嫉廣南人居其上乃召成之夜飲密置啞藥於食中比臚唱成之喑不能應是科上初唱名賜第怒其不恭扶出之太宗端拱初成之再舉登第都下競傳賀師道事上聞欲置於法成之申救謝無有召見太宗嗟賞之宋興廣州舉進士者自成之始初調真定府元氏尉以能著擢知益州經畫有法事稍暇卽立學校課農桑逆亂之俗爲之一變未幾卒於官成之以文章爲南越首倡尤工詩久官於蜀未嘗携妻子居常裕如也人見其閒澹遂誣以爲仙增

城人稱爲紫虛先生繪其像祠之子宗悅官殿中丞勳騎都尉

李思純歸善人皇祐中以三禮出身歷官朝奉郎知封州其弟思義相繼守封皆有遺愛於民士大夫有鵠原之頌

梅蟠字子升歸善人博學強記擢元豐八年第歸日有詩云滄海有風鵬翼健青雲得路馬蹄輕授迪功郎鄉人稱曰梅夫子晚居豐湖號羅浮山人時眉州唐博士謫居與之遊

按唐博士庚子西庚也

梁昭德歸善人政和中以三禮出身授循州簽判有治狀與邑人陳伯彥李文輔爲友鄉里重之號曰三善士唐庚謫惠交遊甚密復官北歸爲賦別三子詩

鄔大昕字東啟河源人政和進士任廣州簽判廣之東道濱海



風波險惡往來甚病大所相視地道依山鑿石開港東起東洲西接黃木灣延袤十餘里濶數丈人稱鹿步濬因其鄉名也建祠以祀

易青歸善人為都督行府摧鋒軍效用廣東賊曾衮已降復叛經畧使連南夫與統制韓京督兵討之募死士夜劫衮營青在行中為所執賊驅至後營趙續砦外謂續曰汝大軍為我所擒者甚眾青大呼曰勿信所擒者我耳賊又言吾不殺汝第今經畧持黃榜來招安青又呼曰勿聽任賊殺我我惟以一死報國賊怒焚之青死罵不絕口青無妻子事聞官為薦祭焉

張宋卿字恭父博羅人警敏強記母方娠父夢人贈詩曰白蓮池上白蓮兒一舉成名天下知四十二年閒富貴滿船空載

月明歸紹興中以春秋魁為天下第一擢進士守肇慶卒於官年四十二殯僧刹名白蓮軒後葬羅浮峯下有白蓮池乃驗夢中之句

潘頊字晉卿博羅人篤學該洽尤邃於易三山林東負時名少許可見預論易遂為之屈乾道中以特科授宜州司法參軍時龔茂良帥廣聘至番禺訓迪諸生南州經學自是日盛梁應龍博羅人貧而好學嘗欲市書而困於錢輒惋惜其母怪而訊焉告以故因解所服簪珥與之登嘉熙進士第時有落第者皆哭應龍亦哭或問之答曰本欲苟祿養親今僥倖一第而親已沒是以痛耳歷任廣西二十年改常德僉判歸家居澹泊不易其節

翟逢亨歸善人事母孝學問博洽邦人呼為翟夫子居白鶴峯



東讀書嘉祐寺蘇軾謫惠時與往還焉

陳煥字少微博羅人安貧守道敝衣蔬食晏如也接物甚謹鄉人稱之曰陳先生提刑芮煜嘗屏道從造其廬見四壁蕭然贈以詩云原思非病貧何患回也雖貧樂有加歲晚與誰同此味梅花深處是君家後以特科調高要簿

林從周海陽人景德二年除泉州安南主簿郡以符召爲掾日持手板與刺史廷辯曲直凜然有國士風主計者聞其賢俾涖劍州銀冶半歲入銅銀七十一萬第其最以聞擢大理評事累官提點浙江東西刑獄以獄空年豐再獻賦頌一以規誠爲本上亦再降手詔褒之族中列衣冠者十有七人從周其始也

許申字維之潮陽人姿宇軒特讀書一經目終身不忘陳堯佐

通判潮州申以布衣見與語奇之大中祥符初舉賢良天子東封獻賦頌者數百召試三人擢申第一授將仕郎累官至江西湖南轉運使嘗因災異言事極詆時弊凜然有直臣風子因仕至太子中舍

林巽字巽之海陽人天聖中應材識兼茂明於體用科對策鯁切有忤權貴有司不敢取慶曆中投匭論事仁宗鑒而異之官以徐州義曹巽不屑就毅然南歸讀易象自著一書名曰草範人稱爲草範先生

陳希伋字思仲揭陽人元豐間兩冠鄉書首薦漕臺肄業太學十餘年聲譽日著士人目爲廣南夫子元祐六年舉經明行修賜第者二百四十六人希伋第一知梅州時朝廷下諸州取黃砂牛皮及買珍珠以備國用諸州郡皆供應希伋獨上



封事奏免州人德之未第時薦太學生馬錫有文武才乞擢用上奇之曰布衣而能薦人於天子自古未有錫後立功人以希伋爲知人

吳復古字子野一字遠遊揭陽人志趣超逸以父宗爲侍講蔭官當得皇宮教授遜於庶兄家居葺治園亭教誨子弟後遣去妻子築庵居潮陽直浦都麻田山中絕粒不食間出遊四方徧交公卿見知於待制李師中師中於世少屈獨於復古曰白雲在天引領何及紹興中蘇軾謫嶺南同遊羅浮爲名其居曰遠遊及軾遇赦還復古與黃洞輩追送至清遠峽忽病不服藥妻子問後事笑麾之儻然而逝軾爲文祭之子茂仲能文章

劉允字厚中海陽人胸膈夷曠於經史百家以至天文地理醫

卜諸書莫不該貫紹聖中進士初任循州戶曹剗草宿弊權知化州化州濱海歲市玳瑁翠羽以萬費允至悉罷之後除新循二州皆不赴致仕卒於家

張夔字政堯潮州饒平人登重和元年進士宰茂名卻豪戶賄黜贓贖吏有廉名諸司薦章有云南中諸縣清介一人高宗特賜璽書獎諭擢判廉州廉產沈香生金官此者皆囊括以歸夔一毫無取遷知新州首興學校築陂瀦水灌田千餘頃民稱張侯陂前後皆以清節著高宗嘗書其名於屏曰南有張夔北有周昕夔五十登第七十致仕卒年九十三所著文號祿隱集子昌裔通判容州嘗示以詩云慎勿與人交水火好尊名節重邱山後能不贊其父風

王大寶字元龜海陽人建炎初廷試第二授南雄教授以祿不



逮養移病歸閱數年差監登聞鼓院主管台州崇道觀趙鼎  
謫潮大寶日從講論語鼎歎曰吾居此平時所薦無一至者  
君獨肯從吾遊過人遠矣知連州張俊亦謫居命其子祜與  
講學時張趙客貶斥無虛日人爲累息大寶獨泰然未幾除  
國子司業擢右諫議大夫奏謂今國事莫大於恢復莫讐於  
金敵莫難於攻守莫審於用人章三上除兵部侍郎後爲禮  
部尚書致仕卒年七十七

盧順之海陽人盧侗之孫事母孝好學篤行鄉評推之登紹熙  
進士調肇慶軍節度推官以母老僅書一考歎曰一日甘旨  
之奉猶勝十年仕宦之樂丐歸十年不調母沒終喪尋卒  
鄭南升字文振潮陽人紹熙中朱子倡道東南與郭叔雲同往  
從之篤志力學有疑質晦翁皆答之自是學益進晦翁喜曰

看文字須以鄭文振爲法又云渠今退去心中卻無疑也一  
時同門者皆尊禮之

郭叔雲字子從揭陽人從文公遊教以爲學切須收斂端嚴就  
自家身上用工夫自然有所得叔雲由是一意實踐不爲虛  
文之學

姚宏中字安道海陽人學力精專性狷介不苟隨登嘉定進士  
先試禮部時劉燾同知貢舉得其文以爲根諸義理擢第一  
名動京師及廷試前期齋沐思有以敷露忠悃感悟上心考  
官以所對切直觸時忌擢爲一甲第三旅寓都城惟日溫舊  
學調靜江教授未赴卒

張達饒平人景炎元年端宗舟次潮州駐蹕紅螺山明年正月  
遷惠州甲子門都統張達率義勇扈蹕妻陳璧娘送至南澳



海中洲上勉達勤王後達弟格直赴厓門壁娘賦平元曲寄  
達宋亡達死難壁娘得達屍葬之曰吾夫能死忠吾獨不能  
死節乎遂不食而死

李關字子羽海陽人早喪父事母至孝性敏好學通春秋諸子  
史皆識其大畧至正間元兵逼城關乘夜負母避難歸外族  
從姪曾氏隱居不仕教授郡邑子弟鄉人有爭者願聞於官  
府耻聞於關時號為北源先生

李士廉字舉之四會人有志喜遊四方尤愛蜀之勝槩因寓  
於錦城輕財好施蜀人敬之熙寧二年河瀧用兵諸將經費  
不節朝廷遣御史按察下總管史王君萬於獄君萬素不識  
士廉士廉知君萬驍將也出錢二千緡與之免罪既出獄適  
值鬼章犯洮隴君萬力戰屢克敵以所獲功為士廉報士廉

曰吾豈望報者天果祐吾有子力學使獲祿養足矣君萬感  
泣後子積中果登進士第歷官御史翰林直學士司馬温公  
作相時積中常與議新法言不阿世蔡京得政黜元祐之黨  
凡一百九十人積中在黨中舊居四會之社山後以黨籍逐  
家豫章子孫多為名臣者

石處道字元叟康州人篤志讀書鄉人因其所居之村山水皆  
名書堂登元豐進士知松江縣以清白稱政暇為詩詞有松  
江集

譚惟寅字子欽高要人紹興中進士讀書一覽終身不忘常夜  
入衢州祥符寺闍古碑就僧假燭不至遂以手模之歸即錄  
所記黎明對本不遺一字後為江西提刑卒於官

梁弼直高要人通五經博學強記五魁鄉舉號為梁書櫃秘書



張宋卿守端州延之齋閣甚禮重之後官鬱林僉書一日假寐夢西海府君牒請至殿庭如玉居講賓主禮請梁撰水城記援筆成覺而錄之明日無病而逝

莫天祐字均祚封州封川人奮身白屋勵志讀書宋嘉定間進士及第知甯遠縣子姪一門俱領鄉薦邦人榮之

黃執矩字才用高要人質樸有古風早獻科舉之文慕濂洛之學常從胡寅張栻遊講明正道參訂中庸大學之義以訓後進為新興丞祀鄉賢祠

伍士階晉康人官累奉議郎知封川秩滿掛冠東歸性耽元寂自適其志子孫俱以忠孝顯同鄉李白先贈詩有云一門萃忠孝竹帛寫家聲

梁孫順字景樞高要人以兩貢辟雍元豐間賜廷對將仕郎出

身宣和間監雍州橫山田州謹乃甯畢等峒金坑舊制輸金監官多有所需峒丁苦之叛服靡常屢為朝廷患先時儂寇陸梁掠平民入峒凡數十年無一人還者梁至撫諸峒以恩信不較其金惟從其便諸酋長悉聽服梁遂以身請歸其民民之從而歸者如市州人德之有梁父母之稱未幾卒於官祀名宦

梁夢奇晉康人世有義方累舉調潯州法曹廉謹自守繡衣使者行部風力甚勁守以下皆獲譴見夢奇獨優禮之薦諸朝遷瓊州推官年六十致仕築室茂林脩竹間集鄉俊課試之郡缺博士委攝焉郡守下車必先訪其廬其推重如此

辭極抗直惇怒以果隸黨藉遷謫坎凜終身



廣東通志卷四十一  
梁楚電白縣人紹興中攝廉州博白縣令時交趾寇犯境楚堅  
城力守援兵不至城陷被執賊以火焚楚楚罵不絕口而死  
高宗嘉其忠節祀鄉賢

陳子全吳川人以太學士舍爲廬陵丞景炎中同主簿吳希奭  
尉王夢應勤王復袁州已而湘部諸郡縣陷沒子全中流矢  
死希奭力戰死夢應收拾殘卒趨永新未幾亦死廬陵稱爲  
三忠立祠祀之弟惟中寶祐進士

陳燾電白人誓十年母死將墓燾欲送至壙人或止之燾曰母  
生育我今日忍以疾而不送乎索塗一二里雙目頓明

梁義夫電白下保甯鄉人有卓行博通經史在庠負時名當路  
以偉器奇之元興屏跡山澗臨歿命其子書宋梁義夫之墓  
林斗南化州人由儒士仕廣西桂林判官勤以泄政廉以律已

人皆慕之後致仕同州張明仲由儒士授廣西鬱林州同知  
時有公田以養官廉年豐則收利歲荒則蠲免民號爲清水  
張後致仕歸

李元芳廉州石康人崇甯間上書論廣西便民十事稱旨累遷  
朝奉大夫知高貴二州有治行

黃叔達字公濟靈山人鯁介持風節以薦辟補正額攝管隨軍  
政交趾至玉山寨克復廣源等五州以功轉承議郎子五濤  
渙沉漸洑濤沈終太學生餘皆入官渙最知名

吳國鑑海康人爲太廟齋郎退居於家先是寇準謫雷州人有  
舍之者爲丁謂所害自是無人敢舍遷客紹聖中蘇轍貶雷  
州儼國鑑宅爲創一小閣元符元年本路走馬承受段諷言  
其事詔提舉常平董必具實狀以聞章惇謂其強奪民居下



州逮治必至雷置獄根治詔輒移循州知州張逢以下降罰  
有差國鑑編管

紀應炎遂溪人號後坡少讀書於湖光巖登寶祐進士初試澄  
邁主簿有以白金饋者潛置箝中覺卽遣還之後宰南海與  
經畧冷覺齋不合自書桃符云靜觀南海清心坐一任東君  
冷眼看經畧竟服其介

陳汝達海康人少博涉好修隱居不仕宋亡達老且病恐身後  
繫元國號預刻石碑題曰有宋陳四五公之墓囑其子慎弗  
改也墓在擊雷山屢經兵燹碑不剝落人以爲義氣所感  
王公輔俗呼王六翁居儋城東東坡甚重之世傳天文折彥質  
亦與相厚一日具冠帶賀折日夜來見客星侵帝座公卽日  
還朝居無何登極赦書果至折公移柳六翁年一百單三歲

### 卒號百歲翁

黎子雲儋州人居州東昆弟貧而好學城南有別墅所居皆  
林木水竹清幽瀟灑蘇軾雅敬禮之每與弟載酒過從請益  
問奇作歌有寂寞兩黎生食菜直臞儒之句一日軾往訪遇  
雨從眾家借笠著屐道上婦人小兒爭笑之子雲兄弟恭敬  
自將送軾至館未嘗懈也因名其別墅曰載酒堂

符林儋州人東坡稱其安貧守靜謂之老符秀才海南人不作  
寒食而以上巳日上塚子携一瓢酒尋諸生皆出矣獨老符  
秀才在因與飲至醉詩云老鴉銜肉紙灰飛萬里家山安在  
哉蒼耳林中太白過鹿門山下德公回管甯投老終歸去王  
式當年本不來記取城南上巳日木棉花落刺桐開

姜唐佐名弼字君弼瓊州人東坡謫儋耳時從之學還瓊題其



課册云雲奧天際歛若車蓋凝眸未瞬瀾漫霍對驚雷出火  
喬木糜碎般地熱空萬夫皆廢懸溜鯁墜日中見沫移晷而  
收野無完塊蓋狀其文氣雄偉倏忽變化也灤城集云吾兄  
子瞻謫居儋耳瓊州進士姜唐佐從之遊氣和而言適有中  
州士人之風子瞻愛之贈之詩曰滄海何曾斷地脈白袍端  
合破天荒告之曰子異日登科當爲子成此篇後遊廣州州  
學有名崇寧二年隨計過汝陽以此句相示時子瞻之喪再  
逾歲矣覽之流涕念君要能自立而莫與終此詩者乃爲足  
之云生長茅間有異方風流稷下古諸姜適從瓊管魚龍窟  
秀出羊城翰墨場滄海何曾斷地脈白袍端合破天荒錦衣  
今日千人看始信東坡眼力長

陳孚瓊山人從太守建陽宋公貫之學得官以歸自是瓊人始

喜習進士業近歲有數人得進士出身自孚始也

趙荆字道授昌化人生時父夢一道人以手簡書荆字授之因  
以爲名先是大觀中同邑符確登薦荆居嘗勵志歎曰吾他  
日不如符先輩非人也紹興中中南省第官至欽高二州判  
官以廉幹稱林森字梅叔及間邱綱皆工詩賦各悠然有自  
得之趣

王霄字霞舉儋州人嘗事東坡七十發貢仕辟雍三年歸鄉年  
九十六推爲鄉先生婦吳氏年亦九十餘州郡以聞授初品  
官黃中羊萊皆年九十餘郡以名聞並授初品官

陳中孚字中正爲萬寧令黎賊犯城居守有勞擢知昌化軍子  
適爲臨高尉儋耳民王高叛適諭以禍福賊遂去郡守以適  
攝郡諸司從之後辟知昌化作繼美堂謂父子相繼也胡瞻



菴爲作記

杜介之郡士也爲高州司法真純野逸有隱士之風李先生先  
贈之詩云南極多老人及見九代孫君生古厓州氣質清且  
温今年八十一頗覺行步奔白髮映紅頰疑是羲皇人

唐文嚴字克寬瓊山人任迪功郎宋末隱德不仕建一亭名曰  
松軒日逸其中留意經史景炎間翰林學士陳仲微省郎謝  
少敏抵瓊臨訪合歡終日改其軒曰廣蔭有詩倡和

謝明謝富冉安國黃之傑俱瓊州人宋末從安撫趙與珞拒元  
兵於白沙口戰敗被執慢罵不屈死之

李廷珙連州人幼岐嶷其舅器之曰此千里駒也其齒若長當  
追風矣出仕南漢時劉鋹爲不道廷珙知其必亡歛塞效順  
太祖嘉其忠義詔授春州刺史兼御史大夫明年獻策平南

漢以爲嚮導官伐之南漢將盧枝戍騎田嶺嶺號咽喉王師  
力攻敗績潘美憂形於色廷珙進曰枝眾皆廷珙故部曲若  
招之必下乃單騎揚旗揮之果謹諫而降南漢乎皆廷珙嚮  
導之力也後官刑部尚書

唐靜連州人父元太宗朝進士靜生而穎異十歲能爲文章祥  
符中進士歷韶州判官執法不撓爲張士遜范仲淹諸人所  
推重子炎景祐中進士三世科甲湟川前此所未有也

雷庠字長善陽山人少聰敏與孔文仲登岳陽樓翫古碑一閱  
卽記三與鄉薦年踰六十始登慶歷進士調衢州西安令母  
年八十偶抱恙棄官歸遂不復出入以其博極羣書因以通  
儒名其鄉

歐陽經連州人家世業儒初任杭州幕官以詩文見稱時蘇軾



帥杭州表薦之云材猷夙壯忠孝兼全學古入官敏於從政後登第官至朝散大夫知封州

廖容字季邛連州人聰慧博學九歲能文登紹興進士知化州郴寇李全嘯聚萬人圍州城月餘漓水獠乘時爲亂大帥陳輝以容領總管職討之金率眾宵遁復召獠長諭以順逆皆降之不施一刃不發一矢竟能保全一城之命輝上其功有詔褒賞後累遷廣南西路提點刑獄卒

歐陽祐字力忠連州人紹興二年登第卽引疾歸吟詠自適士林多其高致尤工書翰爲世所珍

蔡齊基字夢傳連州人年十九預鄉薦爲瓊州戶錄嘗著周易述解九卷瓊莞安撫趙善譚見其書大喜騰寫進於朝參政樓鑰報善譚書曰渙川有此文人瓊莞有此僚屬王孫典遠

藩而能取此書奏聞使行於世皆所罕見也齊基詩尤高嘗自謂少從竹林徐張學詩得四大法門律詩學老杜長篇學東坡絕句學荆公古詩學魯直訓迪後學每以此教之其詞翰踴厲自成一家

歐陽獻可字晉叔連州人幼領鄉薦俄厭科舉程度之文棄去學爲古文嘗作所居見山臺記張魏公稱頌不已爲名其讀書處曰致一堂作記而親書之州苦上供銀額上書州郡乞奏蠲除人咸頌焉

歐陽誠發陽山人能詩善飲姿容奇偉多髯官奉議嘗以詩謝黃庭堅送茶庭堅以詩答之曰歐陽子出陽山山奇水怪有異氣生此突兀熊豹顏飲如江入洞庭野詩成千手不供寫老來抱樸向涪翁東坡元是知音者又云愛公好詩更能多



老夫何有更橫戈奈此于思百戰何

許彥先始與人深明易學尤工書法天聖二年與族人致同第  
進士彥先累遷廣東轉運司素有文名又有彥博登治平進  
士安世登紹聖進士牧政和進士牧於大觀元年與譚煥歐  
陽鈺應八行科著有廣州記皆其族也

徐信南雄保昌人皇祐進士蘇軾謫南海造其書齋見信作甘  
露寺詩平地風烟飛白鳥半空雲木捲蒼籐軾以橫字易飛  
字信歡服

譚侁始與人皇祐進士博通經史三子粹銳拚皆爲大夫一門  
三大夫時人榮之粹知惠州有善政粹子煥字文煥篤志好  
學嘗預薦書進於徽宗朝詔天下舉八行每路以三人爲  
率廣東一十五郡無不應者郡以煥聞朝廷嘉其讓推舉八

行之首次則歐陽鈺亦保昌人許牧共三人爲一路殊選煥  
仍登大觀進士官至朝散大夫

鄧戒始與人與弟闢聯名登第嘉祐進士闢官翰林學士戒戶  
部尚書當時作詩者有九喜聯名喚兄弟之句

鄧酢字賓禮始與人少穎悟杜門讀書紹興初詣闕上書召試  
授官進攻守三畧上嘉納之後知虔州麥一莖數穗歲以大  
穰除廣西運判劇賊凌鐵嘯聚有旨委帥憲漕協力收捕酢  
移檄約其降遂行部至吳川賊黨縛二渠致麾下脅從者萬  
餘人皆釋之使歸業移文靜江俾之列奏帥憲自以爲功而  
酢獨不及人皆爲扼腕既卒胡銓爲銘其墓謂吳川之役口  
不言功以方夏陽之不伐云

王介保昌人慶元中峒寇標掠鄉村逼城下介奮勇搏其前鋒



卻之以功擢武德將軍御題賜旗云海外四州都安撫使  
陳公祐保昌人宋嘉定間與弟汝賓同居共爨性任天真不事  
文飾至成化間裔孫禮恭迪恭勝恭演恭遵其遺規不變凡  
十二世歷年三百食指八百餘內外雍睦絕無間言知府江  
璞躬至其家加獎勸書至和堂美之宏治中知府林符覈實  
疏聞旌表

邱必明南雄保昌人登進士累官韶州僉判德祐中元兵逼梅  
關時東莞勇士熊飛領兵與元帥戰敗還元帥攻城城陷必  
明被執不屈殺之白血流地人哀其忠立祠祀之

羅孟郊其先南昌人五代間有官與寧者因家焉孟郊生而穎  
異早喪父事母孝兒時牧牛長陂莊坐讀書有山人過奇之  
與語孟郊告以父喪貧未葬山人指示地遂葬焉弱冠結廬

羅嶺以學鄉子弟從之孟郊指授篤至邑始多學者善書札  
洗硯池水盡黑人稱之曰墨池天聖中舉進士第三累官諫  
議大夫翰林學士乞歸養母茹葷蕭然冬月母思膾孟郊解  
衣入池取魚供母鄉人目其池爲曾子湖卒眾立祠祀之  
古華字仲通梅州人紹聖間進士教授瓊州洞蠻多遣子弟受  
學會黎人叛奉檄往諭蠻素敬華遂率服狀聞於朝擢守潮  
州有惠政

藍奎字秉文程鄉人性強記書不再閱家無圖史或假於友越  
宿則歸之問之輒能成誦有詩云懶思身外無窮事願讀人  
間未見書元祐中第進士官文林郎郡博士嘗授詔校文福  
州文章氣節人稱爲藍夫子

陳南一興寧人少力學家城中自築莘莊精舍藏修其間文譽



煜然嘉熙元年登進士第官至翰林宣教行業卓冠流輩邑人宗之祀於鄉賢祠

蔡蒙吉程鄉人生而穎悟八歲能背誦五經年十二應童子科登寶祐進士第出身授迪功郎再試銓衡復中第一加三資授韶州司戶兼司法未上值世變郡守湯執中檄權梅州僉書事義兵總督德祐中元招討使易正陷梅州蒙吉被執羈於興寧使其下陳一元守之蒙吉罵曰吾知盡忠報國耳詎肯苟生乎爲一元所殺暴其尸三日顏色不變一元異而瘞之明年文天祥復梅州嘉其忠爲文祭之收骸骨歸葬於鄉元

陳韶孫廣州番禺人父瀏以罪流肇州韶孫年十歲不忍父遠謫遂與俱往跋涉萬里不避勞苦道過遼陽平章塔出見閔

焉語曰天子寬仁罰弗及嗣邊地苦寒非汝所堪吾返汝故鄉汝願之乎韶孫曰旣不能以身代父當死生以之歸非所願也塔驚異以錢賞之後瀏死肇州萬戶府以聞命還鄉里皇慶元年旌韶孫爲孝子

張元俊字元超番禺水西人少雋異不羣兄弟五人元俊最少事諸兄甚謹家庭之內雖讎如也乎居厚重自持與人必信鄉間有曲直者趨訴之片言剖析無不悅服或勸之仕嘆曰吾豈不知仕進之榮哉飛鳥擇木吾將有所擇矣先世居番禺之石井元俊以祖墓皆在水東乃徙香家香家堡香家村在香山非是居焉時值兵起羣盜布滿山谷元俊散財募兵豫防一方之民恃以無恐廣東都元帥王本肅聞其賢錄其功上之徵至授官非其好也尋歸鄉間築園圃以自樂卒



葬水西銀帶山

盧宗文字子敏增城人文宗至順間以儒士辟舉授南雄路始興縣尹恤驛遞輕關稅精謹自持士民頌德後改廣州路推官卒

周修字望舒新會人博通經史既冠邑令聞其賢辟為邑庠訓導性剛直疾惡如讐值元季亂雖名門亦虧名節而陷於惡逆修每遺書諄讓詞語峭直賊帥黃斌見而大怒使人生致之及擁至閉目不為禮厲聲以犬彘叱之遂遇害時太常卿余觀國招撫江南聞而賢之目為義士

羅蒙正字希呂其先廬陵人父稽叔遊學新會遂家焉蒙正資稟秀拔勤學強記弱冠聞肇慶羅斗明工詩往拜之一載而歸大有詩名縣尹沈壽創古岡書院禮蒙正於師席一時學

者聞風雲集後歸仍授徒順帝時開武功銓人或勸其借註巡檢不屑就以詩答之云儒冠不是將軍具只作當年措大看遭元季亂避地郡城館於憲吏趙式家式薦為南恩州教授時州判吳元良亦文士也素慕蒙正名元良有志併合羣醜據有一方欲用蒙正為幕賓蒙正識其志力辭不就後因病以詩謝云願賜一厘間養病簡編燈火伴青衿未幾卒張搆字彥謙新會人羅蒙正弟子性敏強記洪武初以足疾不能行益留心經籍知縣謝景暘為構書堂於象山之麓人往受業咸以象山先生稱之  
李天澤番禺水西人大德進士任新州通判操履清潔盜賊聞其名不敢入新州界

陳大謨字仲謀其先銅陵人父璽仕宋卒於廣州因家焉大謨



性冲澹元初隱居番禺之五馬山不樂仕進中歲以才德薦  
歷官福建宣撫使會閩省蔡五九之亂戢禦有方事平奏罷  
不便於民者六事聞人德之遷樞密副使卒官

阮咏香山人世祖朝領鄉薦爲邑學教諭一時視爲儀表後同  
邑趙梅南善書翰浮游物外嘗作潮居八景詩自號意翁楊  
士元亦邑人皆以詩翰鳴於時由咏倡之

簡祖英字世英東莞人學問該博有才畧事元爲江西都省員  
外廖永忠克廣州徵祖英赴闕拜建平縣知縣以母老上表  
辭歸時上方以道德風厲天下凡元朝降臣始雖榮遇終必  
擯辱名士如危素輩皆所不免人服祖英有卓見

黎獻字子文東莞人性警敏而富學問甫弱冠授徒一依紫陽  
白鹿規以爲教遠方之士聞風而來者戶外之履恒滿別號

拙翁人稱拙翁先生

古護韶州曲江人少鄉舉上春官不第乃隸摧鋒軍母病頤瘡  
不能言食醫藥莫效夜靜精虔奏告北斗以冀母平安扣顙  
未畢忽聞母大呼言夢一道士執水盂以柳枝灑我因覺而  
寤比明疾遂愈爲肇慶路總管軍旅所至每有奇捷人以其  
孝心感格神明呼爲古神孝

鄧可賢乳源人家世業儒至正中郴賊圍乳甚急可賢率民置  
砦固守遣其子一源問道趨韶上方略同知買住率兵破賊  
賊復悉眾來攻凡兩月糧盡可賢奮身出戰被執並其子弟  
七人至湖南同日殺之砦破民四百家無一降者部使劉鵬  
爲之傳郡人立祠祀之一源得脫洪武中授本學訓導

陳肅海陽人字文端恪之子宋末避亂鮑江教授蓮花山下文



天祥過潮召見與語奇之檄爲參謀不就元初以賢良應聘賜第累官朝列大夫總撫湖廣常德路有奇勳卒著有蓮峯集孫元龍官福建廉訪使以疾歸隱龜山闡明濂洛之道戴希文名昌以字行海陽人敦行誼博通經史不樂仕進自號野民鄉人宗之至正間總管王翰怡潮值寇賊搶攘學校廢弛乃聘希文主教事

張奐號魯庵海陽人潛心性理之學靜處一室玩味經旨受業者甚眾家居嚴肅冠婚喪祭一遵文公家禮潮人多化之元末盜起過其里曰此張先生所居不敢犯旁舍亦賴之以安梁全字伯謙其先河南杞縣人宋南渡時父宦遊至晉康因家焉全好學通禮記有文武才任本路同知爲政以厚風俗興教化爲本郡屢爲西寇所擾全諭民防禦自是歲免劫奪

梁國傑陽春人有才略累官昭勇大將軍沿海招討使威令嚴明士卒用命海寇逃跡

郭友德慶人授大中大夫本路總管始領郡事救災恤民久於任所興革協宜惠澤及人郡之父老悉能頌之可謂良二千石卒祀名宦

羅郭佐石城人宋季官廣州路總管運廣東糧餉給北海軍士沿海遇賊而沒長子震次子奇俱戰死奇子元珪救父死之孫世顯襲武德將軍至正間奉命剿海寇戰歿於石礮港昆季子孫咸受爵秩相繼死節粵人稱爲羅五節

張恒電白人泰定間爲千戶高涼徭寇電城勢猖獗諸將有怯志恒披甲躍馬出與賊戰劍戟如林猶奮臂殲賊不休竟以無援死民祀之順帝嘉其忠烈詔旌其祠



吳國寶雷州人性孝友大德八年境內蝗害稼惟國寶田無損人以爲孝感所致

吳正卿字素臣號太素遂溪人元統中歷官至知南甯軍年七十五致仕時已重聽憲副盧嗣宗知其名安車迎以賓禮延至郡庠從容以灰置盤中手書與之語竟日所得俸祿奉親之餘周鄉黨急家無餘蓄

孫希武字立夫遂溪人元時由儒士爲賓州判官歷宰臨桂賀縣所至有聲守已廉潔生平言行謹篤賓陽孫蠻梗化官司莫制希武作詩勸招之翕然歸附

王景賢字希賢別號愚谷海康人延祐間登鄉舉累官清江路推官致仕學富行修著作超逸至治間文宗在潛邸時出居海南道經雷景賢以詩進覽甚喜手書愚谷二大字賜之天

歷中復賜六花宮袍鄉人榮之祀鄉賢

陳杞字楚材號蘭畹海康人學於舅氏王景賢淹貫經史領鄉薦不仕讀書山中遠近學者咸受業焉所居里曰義江元末盜起過其鄉相戒勿犯曰此陳先生里也

蔡微字希元號止庵宋學士襄之裔居萬甯後遷瓊山通經史善文辭知縣李思迪稱其文謂南海儒者未能或之先在樂會校官值時不偶隱德弗耀

張賢瓊山人至正中陳子瑚寇陷郡城瑚死弟有慶接踵與僞萬戶袁元貴等中據瓊城民被荼毒賢倡義兵恢復郡城都元帥陳乾富達其事齎馬疋表裏銀碗賞勞授安撫司僉事洪武初歸附後告老歸田

麥文貴保昌人鐵杖之後元末以博學薦歷集賢學士與修遼



金宋三史

明

何真字邦佐東莞人少英偉好書劍元末以戰功累官至左丞治廣州時中原大亂嶺表隔絕有陳符瑞勸真效尉佗故事者不聽洪武元年太祖命廖永忠帥舟師取廣東永忠至福州以書諭真遂奉表降後官浙江布政使封東莞伯致仕卒上親爲文祭之

湛懷德增城沙貝人苦水之高大父元季多盜練鄉兵保障都邑民賴以安洪武中以破賊功有司建護國保境祠祀之陳添佐新會人世居陳衝自元至明初三世同居性元曠於長堤高柳之間讀書且徜徉焉嘗夜泛舟衝上誦蘇子擊空明沂流光之句樂之曰吾老於此足矣遂自號月溪處士爲人

至孝五歲失怙與少弟添佑育於繼母李元季所在盜起隨母避難顛沛相失爲賊首所得母子不相見者十載每思母歔歔泣下賊首憐而縱之洪武初與弟奉母還陳衝修復故業乃築報本亭娛親堂尋邑令辟爲孝廉會添祐早世乃以母老固辭後以事謫戍遼海亦以母老限於閩帥甫三載得代歸

孫蕢字仲衍號西菴南海人於書無所不窺詩文援筆立就駸駸乎魏晉之風負節槩不妄交遊何真據嶺南開府辟士與王佐趙介李德黃哲並受禮遇稱五先生廖永忠南征蕢爲草降表永忠不戮一人而南海帖然者蕢之力也洪武三年始行科舉蕢與其選爲翰林典藉同輩宋濂樂韶諸人稱之出爲平原主簿坐累罷歸田里尋起爲蘇州經歷復以事坐



累戍遼東已大治藍玉黨蕡嘗為玉題畫論死人皆勸其以  
疏自明蕡不答臨刑作詩長謳而逝天下冤之著作甚富多  
佚不傳

李德字仲修番禺人蚤負逸才博覽羣書洪武中以明經薦授  
湖廣漢陽教諭當兵革初靖蠻舍翳蓬藿中生徒僅十數輩  
皆獷野不可語德盡心訓迪之自是絃誦誦誦人知向學矣  
後解官歸卒於家嘗自號來真子晚究洛閩之學故嶺南人  
稱理學必曰李仲修

王佐字彥舉南海人與孫蕡結詩社於南園開抗風軒以延一  
時名士佐才思雄渾蕡甚重之然構辭敏捷佐不如蕡句意  
沈著蕡不如佐何真開署求士與蕡首被禮聘使佐掌書記  
參謀議時豪帥李質據肇慶真遣佐往說之自是修好不絕

質愛士重文學士多歸之知名者則有江右伯顏子中茶陵  
劉三吾建安張智佐還言於真遣使招致嶺南人文號稱極  
盛後真歸朝佐亦還里洪武中徵為給事中太祖賜宋濂黃  
馬復為歌命侍臣屬和佐立成有臣騎黃馬當赤心之句上  
覽之喜賜鈔一錠居二載乞骸歸著有聽雨軒等集多散佚  
郡人彭森刻於建安者僅詩一卷評者比之高適岑參

趙介字伯貞番禺人博通六籍閉戶讀書無仕進意植二松於  
所居扁其軒曰臨清蓋以淵明自擬行即以囊自隨遇景賦  
詩投其中日往來西樵泉石間不喜接達官貴人獨與八十  
翁劉樂善相倡和有司累薦皆辭洪武中坐累逮京卒於南  
昌舟次子四潔絢繹純皆善詩文介有臨清集行世方蕡佐  
結詩社南園一時名士如黃楚金蔡養晤黃希貢黃希文蒲



子文黃原善趙安中趙澄趙訥皆與焉而介自成一家與黃佐德哲並稱五先生與吳下四傑同輩聲字內

黃哲番禺人歷任州郡以治行稱字庸之弱冠而孤刻苦讀書能作詩造晉唐奧域性好山水結廬蒲澗栖息其中往來羅浮峽山南華諸名勝自以爲未足乃辭家度庾嶺過吳楚遊燕齊間一時湖海英豪皆與遊焉當風雪時泊舟秦淮遇朱文昭涂穎輩相與握手吟詠沽酒大噉自是益有名洪武初知山東東阿縣值旱詣洪範池之龍祠禱焉甘澍應時民歡呼曰此黃公雨也狼溪有怪物善爲幻能竊人啗之哲爲文禱於天須臾風雨大作一青蛟斃水上人訝爲通神陞東平府通判乞歸旣南還橫經授徒四方至者歲凡數百人後以任山東時事註誤置於法郡人士家爲奠祭哲始北上時倚

蓬聽雪常自詫曰天下奇音妙韻出自然者莫是過也歸構一軒名聽雪蓬學者稱曰雪蓬先生子德輿輯其詩文十餘卷號雪蓬集行世嘗經梁昭明太子墓作詩弔之評者謂置選中不可甲乙其精如此

黎貞字彥晦新會人工詩文性坦蕩不羈以酒自放故號陶陶生晚更號秫坡學者稱之曰秫坡先生洪武中爲新會訓導志不樂仕乃退築釣魚臺於居所宅前後以事爲訟者所誣發戍遼東十八年時孫贲戍死遼東貞爲之殯殮奉柩葬於安山之陽爲文祭之未幾赦歸聲聞益著學者從之遠近畢至白沙先生曰吾邑以文行誨後進百餘年來秫坡先生一人而已

鄧信字行甫新會人自稱木石山人精詩畫及岐黃邑博蕭升



端講道慕其人遷瓊教授以未相過索詩書一絕云散袖秋風老一株美人南去有詩無六年相問不相見夢隔西城曉月孤

趙晦字俊明東莞人洪武中任番禺教諭藩憲諸公咸禮重之寓羊城東壩自號東橋學者稱爲東橋先生

黃裳字迪吉番禺人洪武中鄉貢進士永樂初授福建政和縣嘗與典史郭斯厘修縣志其論社所以主石之義曰社祭土主陰氣也夫陽氣積而成天故其精爲星陰氣積而成地故其精爲石石擊則星出陰動陽生也星殞則石化陽變爲陰也土爲陰氣之積而石乃其精故社以石爲主也時稱善論鄧林字士齊新會人以明經中鄉選爲吏部驗封稽勳二司主事言事忤旨謫居杭州後放歸田里大學士楊士奇祭酒李

時勉闔其詩文曰嶺南一代文人也自號退庵所著有退庵集

唐豫字用之南海平步人生而穎悟作詩文有古人風隱居授徒自號樂澹學者稱爲樂澹先生時有平步六逸謂東臯周祖生南軒周祖念節庵劉子羽共庵何淮素庵劉子高及豫也皆衣冠嚴肅爲世所欽布政參議陳贊懿其文行贈之以詩有百鳥羣中孤鳳凰之喻子璧亦有文行

周新南海人初名志新字日新成祖常獨呼新遂爲名因以志新字世居廣州南郭外高第里洪武中鄉貢進士官監察御史敢言多所彈劾貴戚震懼目爲冷面寒鐵京師中至以其名怖小兒輒皆奔匿永樂中擢雲南按察使未赴改浙江寃民繫久聞新至喜曰我得生矣至果雪之初新入境羣蚋迎



馬頭跡得死人榛中身繫小木印新驗印知死者固布商密  
令廣市布視印文合者捕鞠之盡獲諸盜一日視事旋風吹  
葉墜案前葉異他樹詢左右獨一僧寺有之寺去城遠新意  
僧殺人發樹果見婦人屍鞠實磔僧其發奸嫡伏皆此類也  
時境中有虎害爲文告城隍須臾得虎格殺之錢塘知縣葉  
宗人號廉能嘗偵之入其居無長物惟厨中笠澤臘魚一束  
其家所寄者也袖少許以出明日召飲出示葉葉益砥礪號  
錢塘一葉清後新以事爲紀綱所誣被戮臨刑大呼曰生爲  
直臣死當作直鬼

李晟字孟昭南海人器宇凝重見時見者知其必貴舉鄉貢進  
士永樂初上御奉天門選近臣有才識者使廣東撫綏河源  
山澀間流亡之徒上顧晟曰汝其往哉有旨許過家省母賜

道里費人皆榮之後累官河南布政司參政所至有聲致仕  
家居鄉邦論仁厚君子必曰李大參

翟溥福字本德東莞人永樂進士除青陽知縣以績擢南康知  
府至則抹疾苦省刑罰尋以年老乞歸侍郎趙新曰翟君此  
邦第一賢守也胡可聽其去懇請累日乃許之既去眾建祠  
祀於湖堤

陳謬字克忠番禺人中永樂鄉舉授刑科給事中遇事彈劾無  
所避每奏事大聲如鐘廷臣聞之竦背帝令餓之數日奏對  
如故曰是天性也每見呼爲大聲秀才嘗言事忤旨命坎瘞  
奉天門露其首七日不死赦還職尋陞吏科給事中奏事復  
忤旨命復官搏擊愈力爲執政所忌坐落職仁宗卽位遷鎮  
江同知以老乞歸章屢上乃許卒年六十八



梁軫號端溪高要人少卓立有經濟志領永樂鄉薦授監察御史按山西時有指揮抵法餽以金硯一方明珠五顆卻之後爲忌者所中謫雲南典史謝事家居以貞白自勵遂別號貞白

彭森字伯森南海人少孤貧以俊材被選爲郡諸生所服襴衫破缺以紙紮補之有司見而憫焉爲給燈油使力學以是得肆力於書援筆輒萬言鄉舉第一旋登進士累官福建參政未第時娶同里女蓋卑賤人也及得解其家以寡辭親戚復以女貌陋止之森不可竟成婚生子皆賢有舉於鄉者

黎秉繩字宗冕番禺人永樂中領鄉薦爲惠安伯教諭惠安乃太皇太后之兄秉繩以師道自尊而惠安亦克盡弟子禮惠安卒秉繩爲治喪歛祭一遵家禮屏去淫屠以疏請上允之

時公侯之家多尚侈靡咸歎以爲古禮復見於今日也

龔遂字文昌番禺人世居場武都以族蕃遂姓其村曰龔屋邊登永樂進士累官柳州知府致仕歸携數十簾過賊境賊追劫之啟視皆書籍也

廖謹字慎初南海之葛岸人經史靡不淹貫不妄交遊因以澹交名其齋學士解縉稱爲名儒爲題西樵讀書處有曰反身循理懲忿窒欲敬之敬之如金如玉稷契皋陶何書可讀蓋以聖賢事業期之也當是時讀書山中名聞公府識與不識皆曰廖五經以明經舉爲通山教諭性樸實不能諛上官人或笑爲古必謂泥古不通也乃作古必解以自嘲後致仕卒著有澹交集

何潛淵字時曜東莞人富學問立身務循規矩蚤從羊城陳仲



璧講學旅館夜分忽有窺宋玉牆者遽斥使退朋儕重之仁  
宗時知縣李貞舉經明行修薦於藩司以親老辭歸晚年與  
邑耆英結詩社於鳳臺人稱爲止齋先生年八十五卒同鄉  
長史黃結嘗曰維止齋行可媿古之君子才不愧今之名賢  
徐俊生字良友番禺人有文行當宣德正統之盛士夫仕而倦  
遊者有給事中張舉斷事周溥敬主事金誠處士趙絢相與  
爲文字交而俊生爲之冠冕藩臬知其名所謂徐老人者無  
不加賓禮既沒邱濬歎曰善人亡矣穗石濂泉之間服儒素  
而談理道者豈復有斯人哉爲之誌其墓子暉登鄉薦孫瑞  
字邦祥登進士第三人及第授翰林編修時稱翰林三妙謂  
才學書法儀表皆出眾也

陳政字宣之番禺人生而秀穎三四齡時客有以三人聚話命

之對者應聲曰四皓同遊客大奇之嘗作自訟文以警勵提  
督僉事彭琉見之曰此殆潛心孔孟者也亟稱之登景泰中  
進士選爲翰林庶吉士累官雲南按察司副使獻績之京邁  
疾還鄉卒

蔣濬字希舜新會人正統中領鄉薦積學能文尤工詩成化初  
知福建晉江縣視地宜給民以鄉穀種教之播耕民蒙其惠  
名蔣家稻遷漳州同知致仕後惟吟詠嘗與諸名士結詩社  
方後字彥卿東莞人無書不讀景泰中舉於鄉授廣西藤縣所  
至廉能有聲性峭直好面刺人過搢紳皆憚之白沙陳獻章  
皆受規諫稱爲三益

李嗣字克承號介軒南海人登景泰進士出知金華府郡俗婚  
嫁論財生女卽淹殺之嗣嚴其禁後舉女者必字以李歷官



左都御史感疾乞歸卒鄉評謂始終有守者必曰李都憲何中美二人

吳讓字克讓南海人登進士授廣西桂臨知縣以清慎知名陞慶遠知府知縣未及三年陞知府前此未有也慶遠處極邊下車時土官各餽白金三百卻之南丹知州莫必善倍前數以懇之讓口占詩堅卻之曰貪泉爽酌吾何敢暮夜懷金豈不知寄與丹州賢太守元封回贈莫相宜

何淡字中美順德人登進士除知山東濱州陞湖廣漢陽知府教民力田爲築陂堰使時灌漑民歌之曰何太守築漢陂飢得食寒得衣

羅顯韶字九成順德人簡默多智正統中黃蕭養變辟兵瑞州賊誅侍郎揭帖以節鉞鎮廣顯韶詣軍門上書請置縣待郎

嘉納竟奏行其後民無兵擾者八十年顯韶力也別號東澗人稱東澗義士子子房舉於鄉知永福縣治行爲廣西第一







楚雲臺以居之增城湛若水請從之遊復築江門釣臺爲講學之所其學以靜爲主嘗自言曰吾年二十七始從吳聘君學於古聖賢之書無所不講然未知入處比歸白沙專求用力之方久之然後見吾心之體隱然呈露故其學灑然獨得論者謂有鳶飛魚躍之樂而蘭谿姜麟至以爲活孟子晚年用力於書遂自成一家天下人得片紙隻字藏以爲寶年七十三卒卒之日頂出白氣貫天勃勃如蒸竟日乃息子二景雲歲貢生景易庠生萬歷初從祀孔廟追謚文恭

林光字緝熙別號南川東莞人父彥愈嘗謂之曰汝學能有立吾啜菽飲水死不恨矣紆青紫耀閭巷何有於我哉光生而狀貌清臞資質粹美苦學博綜經史領成化中鄉薦會試拜白沙先生於神樂觀語大合遂從之歸江門曰吾得師矣已

而築室欖山往來問學者二十年後赴禮闈中乙榜授平湖學諭以斯道爲己任一時士習丕變未幾主考福建多得名士前後凡三校文時服其藻鑑彛擢國子博士進中順大夫年八十一卒白沙弟子百餘人首推緝熙次甘泉子時衷領鄉薦官鎮南知府有惠聲

張詡字廷實番禺人受業陳獻章少負經濟力行好古莆田彭韶見其少作詩美之曰嶺南孤鳳也舉成化進士不樂仕進御史高公韶疏詡學有體用不爲一偏之用召爲南京通政司左參議病歸卒

黃佐字希顏新會人工詩文成化中舉於鄉仕廣西太平府推官春試時白沙贈之詩云北風雨如注是底別離時黃色眉端動青雲足下馳兒童酣世豢國士醒心期去去江流疾還



君一贈詩按別有一黃佐香山人見後

林紹光字一榮新會人少從陳獻章遊博通羣書得獻章律呂之學成化間舉明經士出其門者甚眾皆彬彬有白沙之風督學林廷玉推重之聘行射禮於各府故嶺南射禮自新會始至今稱學行志古之士必曰林一榮

梁文冠字華卿順德人最先從陳獻章遊因率二子景行景孚學焉文冠館於白沙習道論於碧玉樓詩學益進景行字宗烈既見獻章潛心正學宏治中舉鄉薦官鎮江同知有司欲為治第固辭白沙嘗題其天壺書屋曰打土編茅費幾錢白雲深夜一燈懸知君不是湖山主只借壺山過兩年益以范希文邵堯夫孫明復胡安定四公期之也景孚字宗正

湛若水字元明增城人父瑛母陳氏禱於甘泉洞而生雙臚隆

然兩耳旁有黑子左七右六從陳獻章遊宏治中舉於鄉第進士授翰林院編修出使冊封安南安南國王餽金却不受贈以詩有白沙門下更何人之句尋丁憂廬墓三年產瑞瓜九實相連人以爲孝感所致嘉靖初入朝上經筵講學疏拜禮部侍郎歷吏禮兵三部尙書老請致仕年九十五卒於所居小禺洞有大星隕於廣州河南聲如雷訃聞賜祭葬生平所至必建書院以祀獻章學者稱爲甘泉先生初與王守仁同講學後各立宗旨一時學者遂分王湛之學兩家門人各相非笑子東之廕襲知府

黃澤字曰雨順德人工詩善真草書有文名嘗從陳獻章學宏治中舉解旋登進士獻章聞澤發解有詩曰笑領春風第一花文章誰敢傍飛沙狂歌欲買花前醉不怕無錢付酒家



趙善鳴順德人少孤每誦陳白沙詩心輒馳慕遂拜門下宏治

中舉於鄉官知府工書法爲世珍寶稱丹山先生

伍雲字光字新會人年垂四十始交獻章獻章所可雲亦可之  
獻章所否雲亦否之南山有石可容一榻築室於旁時往造  
其間危坐收歛爲持敬之學嘗作光風釣艇遇良夜皓魄當  
空水天一色乘艇獨釣或設茗招獻章共啜悠然賦詩傲睨  
八極獻章亦扣舷而歌仰天而笑飄飄乎任情去來不知天  
壤之大也別於白沙築室三間獻章題曰尋樂齋爲光字間  
業之所年四十七卒

李孔修字子長順德人自號抱真子張詡薦於其師陳獻章獻  
章亟稱之由是著名家貧蔬食不繼詩字不履前人自爲尸  
牖或觀山水歸卽圖之見者愛而酬之金二十年不入城闕

間出廬戶則遠近圍視以爲奇物稱曰子長先生

容貫字一之番禺人從陳白沙遊嘗至京師見聲利烜赫輒不  
樂語人曰古之仕者將以行其志耳徒食人祿而不知恥吾  
不能一日居也白沙嘗至其宅有敝衣寒露肘破屋早知秋  
家業憑孤翰厨烟任去留之句

易元字德元新會人爲郡學生有名常謁羅倫倫贈以南海三  
峯記謂南峯德元東峯秉常兩峯容彥昭也

湯雷字民悅九山新會人兄雲弟霓皆從陳白沙遊時鄉射之  
禮久廢知縣羅僑聘雷及諸生林紹光等損益禮儀提學林  
廷玉命徧教各郡嶺南鄉射自此始

林棟新會人陳白沙嘗曰所居之旁伍雲鍾淑林棟此其人皆  
可與遊



陳魁新會人事白沙最久白沙與書曰昨望見生龍鍾如東田  
老人稍就之疲頓與石翁異者幾希然與之論舊事寫平生  
於我三沐三薰之歷歷猶是也惟日孜孜斃而後已生與我  
皆然復河道哉

李輔號芝松清遠人白沙高弟也白沙赴召輔贈詩云曾向江  
門弄釣絲海風吹浪潑蓑衣忽驚天子黃麻詔打破先生白  
鷺機品甚高一時臺省咸重之著有芝松集

尹鳳字舜儀增城人天性孝友言行有古人風與湛若水同遊  
白沙門築萬竹臺於九龍巖相與講學因號爲萬竹嘗與邑  
顧鸞鄭潔温裕趙元甫湯璽十七人構鳳臺詩社相倡和邑  
令朱文簡造其廬有縣官到門日三丈萬竹主人頭未梳之  
句屢賓於鄉卒八十二

馬廣生字元真號默齋新會人白沙之友子國馨姪貞同遊白  
沙之門嘗相與作均田法以祀其兄之無嗣者白沙嘉之書  
其後知縣丁積稱馬氏處家有禮讓之風均田一事可法於  
後世

謝佑字天錫增城人補府庠生棄去從陳白沙遊一聞主靜竅  
絜遂築室葵山之下棲焉窻甚並日而食塵世名利不少罣  
胸臆與順德李子長稱二高士

陳瑞字德貞新會人性豪邁不羈善寫雲煙山水師事白沙力  
於學嘗以非罪望名縲紲白沙救釋之後逆旅樓中客有議  
白沙之學力辯之大呼墜樓折肱其篤信如此

張希載字博之順德人從遊白沙嘗誨之曰君子之心嘗存恐  
懼於善有未遷於過有未改恐生懈怠於靜曰惺惺於動曰



惺惺恐生冥醉湛若水曰昔遊白沙惟柏山張子學有端緒  
柏山卽希載也正德中教諭攸縣士薰其德

周郁字尙文號耿庵東莞人應禮記明經福建漳州訓導培育  
漳士林啓數十人後啓等掇科第十有八九皆郁裁成焉歸  
里與陳白沙唱和有龍洲草集行世子昌齡齡子訥俱有詩  
名納子一士字昆彥博學雄才生平有米南宮癖世稱石林  
先生

梁繼灝字行素號澹齋新會人稊坡黎貞高弟博學有行誼嘗  
以書授白沙陳獻章稱之曰吾邑以文行教後進百餘年稊  
坡一人而已當時在稊坡之門者不少獨澹齋傳其學嘗教  
授羅山之下邑人魯能吳韜鄺慈皆出其門著有澹齋集  
魯能字干之新會人登進士累官甘肅巡撫有政績性溫厚未

嘗談人過至論公事則侃侃不回卒祀鄉賢

李大震字東伯東莞人事母孝母病日夕禱於天願以身代至  
今稱有孝行者必首李氏一門

韓殷字阜民號雪鴻番禺人景泰中進士歷官刑部郎中伸冤  
理枉不避權要號韓鐵筆都人比之二鮑

吳澹字源深增城人景泰進士初令弋陽以古循良自期遷饒  
州同知清操愈勵性喜吟詠庭前有古梅二因號雙白居士  
蓋自況也所著有雙白集卒年三十九

黃瑜字廷美香山人景泰中舉於鄉入成均天順初天變求直  
言應詔疏上六事凡數千言觸權貴將得罪吏部尙書王翱  
等救之乃免成化中授長樂知縣多惠政有豪氓殺人匿其  
屍訊不服法司欲從疑釋因請自訊忽蚩蜍折左股斃於硯



謂曰汝折其左股沈黑水池中神告我矣岷驚服以勁直忤當道浩然去既歸徙居番山下手植雙槐構亭吟嘯其中自稱雙槐老人曰子孫能更置其一則吾志畢矣蓋踰蹤三槐也卒年七十三

黃畿字宗大香山人喻子七歲善屬對鼓琴見者呼為奇童十六補郡庠通詩春秋二經撫茹百家滌去陳語督學僉事張習稱為古作然竟不能取合有司以養親歸自是絕意仕進隱居粵山之椒乃研九流通三才五行之蘊性至孝居喪既葬日猶哭墓方晨有虎突至俯伏而去山人廖翼見之大駭為作孝子感虎歌卒年四十九別號粵洲學者稱為粵洲先生

何靜字源清東莞人舉成化進士授松江府推官明允清慎門

無私謁知府王衡贈詩有曰關門共惜寒儒苦斷獄爭誇老

吏明按白沙弟子別有一何靜番禺沙灣人

黃皞字時雍南海人登進士讀書太學幾二十年明習典故人多從之累官雲南左參政巨璫崔安忌皞功語侵之皞不能平聲色俱厲安媿屈連呼鐵漢吏民因稱鐵漢公

袁仕鳳字彥祥東莞人成化進士初授江西廣昌縣廉介風厲摘伏如神扶弱鋤強奸黨為之褫魄人有侵漁者皆斂迹民歌之曰袁大宰真男子鋤擊豪強貧撫字吾今求取古人中惟有董宣能似此後官都察院都事卒

倫文叙字伯疇別號迂岡南海人長身玉立頭顱大尺許幼時術者見之曰此兒必魁天下宏治中入棘闈中高等會試殿試皆第一授翰林院修撰學行才器為世所重尋陞右春坊



兼侍講主應天試所得多名士卒於京子長以諒字彥周正  
德中鄉舉第一登進士授翰林院庶吉士官至通政司叅議  
次以訓字彥式登賢書會試第一殿試第二授翰林院編修  
官祭酒次以銑字彥羣登進士時海內人士謂倫氏父子兄  
弟相繼登三元爲古今罕見

洗光字汝實順德人登宏治進士授江西安仁縣潔已愛民善  
辯疑獄有寃人子誣陷大辟歲久不白光一訊立釋之百姓  
爲之語曰民無冤訟有洗燈籠訟無滯屈有洗三日言其明  
且斷也累官陝西道御史劾劉瑾專權江彬誘駕巡幸侃侃  
數千言咸爲光危光不動色疏亦留中遂乞歸養

黃衷字子和南海人宏治進士在都與朱應登顧璘陳沂輩以  
詩文擅名官至刑部侍郎致仕卒所著有矩洲文集十卷海

語一卷行世

盧綸字朝言別號望峯增城人登宏治進士授行人嘗奉使至  
安南安南人以八寶盤爲贈弗受安南重之遺之詩有名樹  
銅關月清搖桂海風之句遷戶吏等科給事中劾逆瑾奸狀  
不報瑾得匿名書怒甚執庶僚三百餘人下獄時酷暑多暍  
死者綸獨氣舒若有神助不死出爲四川參議屬大饑出賑  
甦者數十萬時乾清宮災興工營建侍郎某人蜀採大木專  
倚辦於綸及得大木萬人輓之出山至平陸民力已竭而距  
水猶三百里綸爲文祭木請輕之是夕忽大風雷雨江水暴  
漲大木順流而下不知所向吏或危之綸曰此神之相我也  
越數日得報則已下湖廣彝陵界矣武廟嘉之賜以金幣陞  
四川按察使適楊廷和當國子弟怙勢橫行綸置之法廷和



祈免不許銜之以事罷綸遂致仕歸年八十九卒

洗文淵字希哲順德人宏治舉人知南安縣性方介不能徇上居官清苦食無重味邑民謠曰洗清清冷如冰權豪欲中以奇禍而無計後陞南昌府通判

陳觀字思賢南海人學諸子百家書強記數千言從孔百平遊築亭江濱日憩其上四方髦士多就講學長於詩與鄺筠巢戴雲輩結社為莫逆著有滄江集傳世

方獻夫字叔賢南海人舉宏治進士改庶吉士累官員外郎與主事王守仁論學悅之遂請為弟子尋謝病歸讀書西樵山中十年嘉靖改元夏還朝道聞大禮議未定草疏上之帝大喜屢遷至武英殿大學士與張璁桂萼共事持論平恕引疾歸卒謚文襄

區瑞順德人初為諸生有才名負節氣學宮銜之言於督學黜為德興典史捕桃源賊有功已奉檄修城萬年賊突至被獲欲降之瑞指其腹曰此中皆節義文章豈從賊耶遂遇害

黎貫字一卿從化人正德中進士改庶吉士累官陝西道監察御史時帝從張孚敬議去孔子王號改稱先師貫率同官合疏爭之帝震怒褫貫為民卒於家從化建邑後士登第者自貫始

李翔新會人嘉靖中進士授衢州推官凡事有裨於民者必堅持之動忤當道不變時鎮守太監虐民翔手鐵如意擊之於座羣小震懼斫人呼為鐵尺在衢二年蕭然獨處惟做唯一奩破篋二楮及圖書數卷而已與副使朱裳仁和令李義壯號三清未幾陞福建邵武知府大興文教然性過剛不能善



事上官以事忤當道遂挂冠歸嘗推明性命理氣之原發先人所未發學者尊之卒祀鄉賢

曾俊字仲才南海人弱冠有文名正德中舉於鄉銓授廣西融縣戢修學宮興社學暇則進諸生講解不輟興至遨遊巖洞偕士人觴詠浩然有老安小懷之度制府檄征銅鼓山蠻有功時璫瑾擅權官非入賄不得遷俊屹不爲動邑之牛稅歲入千緡前令多乾沒俊悉登於籍人令爲子孫計則曰吾自有不盡之福遺之也竟以廉介不能徇時免歸嘉靖中博羅翟宗魯亦知融縣廉與俊埒語曰融令清白前曾後翟宗魯著述甚多有鶴峯集洪範圖籍輯諸書藏於家令融時有訓俗篇大關世教子應珪孫士鑑相繼中式名顯於時

黃佐字才伯號泰泉香山人嘗就外傳問曰大學自綱領條目

之外何以釋本末而不及終始師不能答十二歲舉子業成乃更學爲古文詞正德中鄉薦第一登進士選庶吉士授編修康陵既附大禮議興禮官毛澄議兄終弟及無追尊之禮宜仿漢定陶王故事佐主其說異議者以爲黨方請終養家居九年遠近學者日衆闢粵洲草堂以居之巡撫陶諧薦佐文章華國謀猷經邦諫臣董進第以遺逸薦禮部侍郎呂柟以宮僚薦皆爲議禮者所沮會簡官僚擢國子祭酒丁母憂歸年七十七卒穆宗詔贈禮部右侍郎謚文裕所著有詩文集樂典春秋傳意革除遺事翰林記廣東通志嫩芳集人物傳等書傳世學者稱泰泉先生其弟子多以行業自飭而梁有譽歐大任黎民表詩名最著

霍翰字渭先南海人正德中會試第一讀書西樵山世宗踐阼



除職方主事會大禮議起禮部尚書毛澄力持考孝宗韜私  
爲大禮議駁之澄貽書相質難韜三上書極辨其非已知澄  
意不可回乃上疏曰按廷議謂陛下宜以孝宗爲父興獻王  
爲叔別擇崇仁王子爲獻王後考之古禮則不合質之聖賢  
之道則不通揆之今日之事體則不順帝得疏喜甚而朝士  
咸指韜爲邪說韜意不自得謝病歸尋擢侍講學士進禮部  
右侍郎大禮成超拜禮部尚書卒於官謚文敏韜學博而量  
褊隘所至與人競帝頗厭之故不大用然其感格有甚奇者  
峽山有虎患韜文責山神俄而雷震殺虎峽江中有妖石壞  
舟過者必祭韜祝告於天卽雷裂其石所著有象山學辨涓  
厓集諸書行世學者稱涓崖先生弟任最知名

霍任字尹先南海人韜之弟弱冠以諸生兩應舉不第輒謝去

習靜西樵山中與陳白沙高弟鄧德昌輩泉石自娛嘗從王  
文成湛文簡遊窮究理奧所學日邃居西樵三十載人化其  
德所著有心性說解宙山剩言行世傑字民先任季弟倜儻  
不凡脫然世外終身不娶有林逋風嘉靖初忽出省城登越  
王臺坐石而化

鍾雲端字天慶東莞人性溫粹潛心書史正德中舉進士累官  
湖廣右參議嘗師事湛甘泉而友林次厓別號黃山鄉人稱  
黃山先生伯兄雲祥字天兆登嘉靖進士官九江知府所至  
有聲論者稱爲百粵儀表一代球琳

王漸逵字用儀一字伯鴻番禺人世居沙灣青蘿山人稱青蘿  
先生力學苦志從湛若水遊受五經大義學日進年十九領  
鄉薦旋登進士霍韜嘗曰吾生平莫逆交惟用儀與日孚耳



補刑部郎上疏請行帝王之政五事不報乞休歸著述甚多  
譚清海字永明東莞人爲人高視闊步好談天下大計嘉靖初  
以布衣上十事於朝當道阻之穆宗卽位走京師復上三大  
禮疏不報乃仗劍出塞時戚繼光爲邊帥清海先闖其營戍  
入見曰四面置守兵勢易分何不一字守耶繼光拍案擊節  
次日偕之巡邊築隘減戍皆用其策大學士張居正御史龐  
尙鵬尙書葉夢熊稱爲當今奏議第一將留之讀中秘書清  
海曰吾能爲直布衣不能爲假仕宦固辭家近羅浮每翔翔  
見曰臺間自稱見日山人卒年八十四有詩文雜著十餘種  
潘光統字少承順德人補弟子員好圖史作怡馨堂飛雲閣爲  
藏書之所著詩文若干卷子豫之益之皆雋敏能文章豫之  
子憲龍庠生負奇氣詩有祖父風可謂三代詞藻

陳其真字才甫別號唐山番禺人領嘉靖中鄉薦補福建連城  
縣乞休歸家居與里人劉模岑萬龐嵩何維柏諸公四仲月  
爲天關大會發明聖賢心性之旨又爲粵山詩社吟詠性情  
生平敦孝友尤嚴義利之辨所著思誠日錄讀易疑義及文  
集時稱爲有道古儒

黎瞻字民仰號前峰番禺人舉嘉靖中鄉試初任尤溪縣教諭  
尤溪故下邑土風樸野瞻至課以古文詞尤士蔚然稱風雅  
累遷至府尹丁外艱歸自是無仕宦意日與大宗伯何維柏  
虞部郎歐大任主事王漸遠等研究理學著有燕臺集行世  
當嚴嵩專國時粵人仕於朝不附嚴氏者順德梁有譽番禺  
羅憲及瞻而已

何維柏字喬仲號古林南海人嘗慕西樵泉石之勝讀書其中



時湛文簡霍文敏方文襄亦山棲與語多默契嘉靖中舉於鄉登進士授御史疏劾大學士嚴嵩奸貪罪比之李林甫盧杞帝震怒遣官逮治士民遮道哭維柏意氣自如賦孤臣尙有生還日聖德真同宇宙寬之句民間矢爲歌謠下詔獄廷杖脩極拷掠語不變入獄與楊斛山周納豁劉晴川三人聚首甚愜上一日於宮中扶鸞判曰養身莫要於寡欲治國莫先於惜才上默悟維柏乃削籍家居二十餘年隆慶改元召復官累遷至南京禮部尙書年七十七卒謚端恪所著有太極圖解天山草堂存稿諸書行世學者稱古林先生

劉模字叔憲號素子南海人嘉靖中舉於鄉授浙江蘭谿教諭大學士澱陽趙氏其受業門生也擢知貴縣致政歸與龐彌唐嵩何維柏諸人爲詩易會

郭棐字篤周番禺人父大治字思道嘉靖中舉於鄉爲萍鄉教諭御史大夫張岳標其學行於全省曰江右學式棐少師湛若水登嘉靖進士授主事穆宗卽位次日御札出封七夫人棐納還之力諍事得寢累官雲南布政使致仕卒所著有粵大記嶺海名勝記夢菊全集行世

蒙學之字念常別號脈渠番禺人嘉靖中中鄉試知浙江昌化縣以事忤權貴飄然挂冠歸暮年偕劉素子諸人結社坡山談詩講學耄耄不倦年八十一卒

林烈字孔承別號艾陵東莞人嘉靖中舉於鄉官至福建鹽運司與鄒文莊羅文恭何亞卿何古林輩交遊皆以道鳴海內所著有青山紀聞臥雲洞詩文等書卒福建祀名宦祠廣東祀鄉賢祠子六培坦城俱領鄉薦培官湖廣新化知縣以績



徵授南京御史坐言事忤旨告歸京師語曰南林北馬臺省  
增價馬通州人名經綸以直諫同時得罪坦負才傲睨高自  
位置人目爲狂生

龐嵩字振卿南海人居弼唐鄉嘉靖中登鄉舉肄業羅浮山從  
遊者雲集歷官至刑部郎中有善政人目爲龐青天末幾爲  
忌者所擠罷歸築室西樵大科峯下優游自適學者稱弼唐  
先生著有太極解圖書解卒年七十七子一夔一德皆中鄉  
科

黎民表字維敬自號瑤石山人貫長子也其母夢有羽幡者數  
十人從雲中擁一童子五色璀璨覺而生民表幼穎異嘉靖  
中舉於鄉久不第累官河南布政司參議致仕居清泉山中  
開社日與弟民衷民襄友人吳旦梁有譽歐大任梁孜倡和

其間明自孫賈五人以來嶺南詩學復振與有力也海內名  
流如文徵明父子皇甫汈兄弟王世貞周天球沈一貫輩尤  
所友善凡歷仕三朝累膺金綺之賜崇祀鄉賢又祀抗風軒  
生平工真草隸尤工詩賦所著瑤石山人稿梅花社稿北遊  
稿行世弇州以歐大任爲廣五子黎民表爲續五子弟民衷  
字惟和膺鄉薦爲廣西糧儲參政蠻寇亂率眾與戰被創卒  
民襄字惟仁受業黃佐與兄民表民衷肄業粵山有三鳳之  
稱

吳旦字而待號蘭臯南海人父章爲官有風節旦幼穎悟嘉靖  
中舉人官至山西按察司僉事爲諸生時師事黃泰泉與歐  
大任黎民表梁有譽爲友結社南園世稱南園後五先生之



李時行字少偕番禺人讀書羅浮青霞谷自號青霞子舉進士授浙江嘉興知縣同官忌其名飛語中之不能自明遂拂衣起延覽西湖卧遊天竺東厯泰山西上匡廬以散其孤憤激昂之氣歸而杜門讀書逍遙六籍嘗與歐大任梁有譽黎民表吳旦等稱後南園五先生

梁有譽字公實順德人弱冠補弟子員與歐大任陳紹文吳旦黎民表民衷民襄陳冕梁孜梁柱臣同學於黃佐以詩古文相劇切登嘉靖中進士授刑部主事善折獄先是李攀龍官刑曹與濮州李先芳臨清謝榛孝豐吳維岳輩倡詩社王世貞初釋褐先芳引入社遂與攀龍定交明年先芳出爲外吏又二年宗臣與有譽入是爲五子未幾徐中行吳國倫亦至乃改稱七子諸子多少年才高氣銳互相標榜視當世無人

才七子之名播天下播先芳維岳不與已而榛亦被擯攀龍遂爲之魁其持論謂文自西京詩自天寶而下俱無足觀於明朝獨推李夢陽諸子翕然和之嚴嵩當國子世蕃欲親有譽恥之遂乞終養歸築拙清樓杜門讀書年三十六卒

歐大任字楨伯順德人別號崙山工古文辭詩賦年十四爲弟子員督學林端簡雲同張萊溪希舉嘗合十郡異等士三試之皆列第一名噪諸生與梁有譽黎民表梁紹震相友善同學於黃佐由貢生試大廷瞿文懿得其卷驚曰一代才也特進御覽列第一由是海內無不知大任者隆慶中授江都訓導應詔上封事一曰率講習以敦實學二曰申法制以廣生徒三曰修載籍以重掌故四曰崇實學以表賢才當道爭相推轂名益起與七才子並驅才或過焉上幸太學御書不二



二大字賜之嘗扈從南郊命賜果餅回回國貢馬不受作天馬篇以頌歷工部郎中以老乞休年八十卒著有百越先賢志諸書行世

盧孟陽字少明南海人登進士典試禮闈多得名士與同邑雙村馬拯齊名時稱盧馬

霍與瑕號勉齋南海人藪仲子舉進士授慈谿知縣與海瑞齊名時稱二廉以事屢為言者所劾歎曰吾安能隨時俯仰視人眉睫乎遂拂衣歸

方紹魁番禺人正德舉人為沙縣令時有二狐入虎之患魁禱於神後一狐擊於雷一狐入縣伏辜三虎投竄魁躬率入其穴連殺五虎有捕虎吟子肯堂字子昇進士授湖廣慈利令多善政

羅一道字貫卿東莞人登嘉靖進士授刑部主事時嚴嵩當國多納賄得美秩者或勸之一道謝曰升沈命也可贖貨于進耶十餘年不得調嵩罷稍遷至郎中提督湖川貴三省糧儲故事輸餉者必以餘銀加錙上謂之滴珠一道革之以事忤當道解組歸年八十四卒

梁學字壯行號雪橋番禺人少穎悟從陳元誠遊於黃灣構亭架橋橋成大雪時至因號雪橋與隱君七人為泉石交人目為八仙友子士楚舉於鄉知詔安縣有善政

陳萬言字道襄南海人登進士累官福建巡撫為忌者所攬摭致政歸結社浮邱優游林泉十餘年卒

袁昌祚字茂文東莞人登隆慶進士累官四川參議性和易為時所重郡邑行鄉飲禮延為上賓辭曰不肖生平所不願者



四生不願賓鄉飲死不願祀鄉賢進不願款權門退不願病鄉里

鍾繼英字樂華東莞人少失怙母劉督教之勵志嗜學登嘉靖進士授監察御史穆宗登極集宦者千人演武大內名曰內操繼英慨然曰內廷非肄武地且闈人之職止於掃除今令習弄凶器將焉用之上疏切諫親識多危之已而疏竟留中內操事亦罷督學南畿拔宜興名士吳夢熊補湖廣按察副使病作抵家養病十年卒

尹瑾字崑潤東莞人隆慶中進士授福建漳州推官誅劇盜鍾乾華等聲譽大振號二十八將

梁煌哲東莞人號生洲有孝行母病刲股以進母愈哲患背癰痛楚垂死謂其弟曰吾行矣人死固如是乎吾左足大趾初

一點寒如冰雪漸及五趾由下而上至脛膝右足亦然乃指其臍曰寒至此中氣當絕矣其弟曰古人云死生之際正宜用力暫閉目須臾乃曰無可用力但念老母在堂情不能割中心如焚不覺火從臍起臍中之熱直驅兩足之寒其母趨至暫力疾起日兒無恙寒氣退盡兩足仍溫矣已而病如脫癰亦愈噫此乃暫性之所至也不忍舍其親以死斯不死矣後母歿哀慟過傷里人為罷春

姚文寬字裕夫南海人父經有隱德文寬幼穎悟壯從父遊廣右所過佳山水多題詠與同志爲蘭亭詩社子光虞光南光泮相繼登科光泮守泉州吏民畏而愛之解組歸闕郭西荒畦構堂榭結社賦詩相國史繼偕顏曰亦自丹邱

吳綱字內閣一字錦先增城人萬曆舉人知黃巖縣至卽誓於



神勿私入一錢歲祿不忍追呼府檄趨軍餉甚急民恐負乘  
燭爭輸不終宵有溢其額遷雲門知縣前此有山陰蔣汝礪  
臨海王立穀皆一時師表學中口碑云前有蔣王後有吳潘  
潘名遴

梁斗輝字忠旋新會人領鄉薦以權監之難羈管北寺在獄五  
年與湖廣僉憲馮應京荊州司李華鉦等四十餘人講學不  
倦後赦歸擢國子學正遷太平同知折獄祥刑人稱鐵面江  
防

郭尚賓字朝諤南海人萬曆中進士授刑科給事中與御史凌  
漢紳論事忤旨同日謫官時稱二諫後官江西巡撫以不附  
魏璫削籍崇正初復官卒宦京邸時倡修嶺南廣州諸會館  
爲士居停之始

李待問字葵孺南海人登萬曆進士初授連城知縣累官戶部  
侍郎兼督漕務時漕法濡滯待問爲整飭之越年拜本部尙  
書數召問賜坐御札第書計臣而不名隆眷冠諸廷僚後得  
痿疾以病終賜諡忠定

毛可珍字美仲原名原鎰香山人萬曆中舉於鄉知諸暨縣縣  
在萬山中夙稱難治可珍月吉讀法進父老講仁讓政大和  
俗多溺女爲嚴連坐法由是存活者衆晚年高蹈不出卒年  
八十八

黃士俊順德人萬曆中殿試第一授修撰歷官禮部尙書子告  
歸父母俱在錦衣侍養人以爲榮

趙響字心極東莞人宋進士必瓌九世孫夙承家學潛心性道  
師事楊文懿起元一日文懿言性有動靜乎曰有動有靜者



心無動無靜者性問知能曰知善知惡是良知爲善去惡是良能知孝知弟知之至能孝能弟能之盡文懿然之生平有孝行尤力學一時名賢如黎民表袁昌祚唐伯元輩皆樂與之遊

陳熙韶字仲慈南海人弱冠同弟熙昌應選貢入南雍與邵景堯輩雁行馮司成夢禎賞識之稱嶺南二陳

梁元柱字仲玉順德人天啟進士授翰林院庶吉士遷陝西道御史時魏奄竊柄與客氏交煽一時宰執大臣皆輒靡聽命副都御史楊璉首疏魏璫二十四大罪柱繼疏爲宮蒼之告變已彰聖主之去奸宜決纍纍千萬言皆切時弊同時直聲震天下璫銜之削籍去歸五羊選勝粵秀山每月夕花晨邀朋舊賦詩飲酒醉則縱筆作畫無不精絕人爭寶之

繆士傑香山人選貢生尙推解之義任潁川衛經歷減耗羨平

斗甬屯民賴之告休歸九列賓筵卒祀鄉賢

韓上桂字芬男一字孟都番禺人父禹梁夢美丈夫持青蓮拜呼爲大人遂生幼穎悟絕倫日誦萬言如宿記登萬曆中賢書時與同里陳子壯韓日纘李待問等爲聲氣交名益著稱萬曆間嶺南第一才子補易州學政時流寇擾攘輒扼腕時事後卒於寧遠

袁崇煥字元素東莞水南人萬曆中領鄉薦登進士授邵武知縣爲人慷慨負膽畧好談兵遇老校退卒輒與論塞上事曉其扼塞情形以邊才自許天啟中擢兵部職方主事會廣寧師潰廷議扼山海關崇煥卽出關閱内外形勢還朝具言可守之狀遂超擢僉事監關外發帑金二十萬俾招募乃大築



孟遠城明年迄工孟遠遂爲關外重鎮未幾遭父憂奪情視事疏三上乞終制不許崇禎初命以兵部尚書兼右副都御史督師薊遼賜尚方劍至卽數大將毛文龍十二罪斬之後爲其黨及魏忠賢所嫉坐事棄市天下寃之

陳子壯字集生號秋濤南海沙貝人母夢神人以丹桂枝拂其腹曰俾爾生兒流芳百世及生異香滿室登萬厯進士授編修天啟中典浙江鄉試發策制闈暨闈築鄔落成欲子壯書元勳二字扁於堂曰書此當得好官子壯堅却忠賢怒撫拾浙江鄉試錄中語爲誹謗削子壯及其父給事中熙昌籍崇禎初起復累遷禮部右侍郎未幾坐事除名歸闕雲淙別墅於白雲山中復修南園舊社久之廷臣交薦起故官後至大學士兵部尚書崇禎未殉節

區致遠字爾遂新會人生二十餘不肯學里衆姍笑之乃發憤從師日不滿三四行久之其弟舉於鄉致遠讀其文瞠視曰直若是非甚難到也師叱曰汝何得大言致遠請自試應筆立就皆可觀明年遂舉於鄉爲都察院都事會都下大疫致遠所居前後左右無存者而致遠家晏然世言疫有鬼於是都下頗傳區都事能治疫鬼有得其花押者持至門則室內病人立起某御史病甚過致遠致遠曰入吾榻內臥當廖也其人少睡得汗病良已致遠以此有德於大僚擢員外郎後死金陵

蕭奕輔字翼猷東莞人天啟中進士擢廣西道御史巡按浙江值旱禱雨隨車而澍民有蕭霖之誦撫福建以時議不合告歸家居梨園演武宗遊幸事亟起立戒伶人罷去每朔望必



拜闕如禮其祇敬如此

黎遂球字美周番禺人曾祖瞻父密母蘇方娠父夢孔雀集於庭大司馬陳子貞過之是夕生遂球九歲能文工詩及古文辭下筆輒奇警天啟中舉於鄉數上公車道經吳越與徐汧吳偉業張溥張采金聲陳際泰輩唱和樹幟中原呼絕代才子未幾抵邗關集鄭超宗影園賦黃牡丹詩十首列第一鐫金罍爲資時稱牡丹狀頭後官提督兩廣水陸義師戰死陳邦彥字令斌順德人少以文行負重名及門士歲數百人先後數千人以其所居稱巖野先生爲人長身美髭髯性慷慨喜任事其學爲嶺南所宗凡受業者一訓之以忠義屬當變亂相從起兵者有馬應芳霍師連楊景煜皆摧鋒陷陣以死邦彥哭而祭之曰吾爲師乃不及吾弟子爲君而死實爲師

而死也自古死於君者多有之死於師者三子之外曾幾何人吾不可以負之後邦彥亦死

朱學熙字叔子清遠人忠孝質直至性過人留心當世之務嘗於峽山最勝淙碧軒中奉十主魯仲連張良班超蘇武諸葛亮郭子儀韓琦寇準范仲淹王守仁朝夕事之以志願學每取落英封之於南禺號曰花阡

鄺露字湛若號海雪南海人生而甘露降庭槐故名不飲母乳愍師至命提跡摩頂曰天上玉麒麟也豈黥人間乳氣哉以露水調米汁飲之五歲師與父命作詩應聲而就年十三遊泮負才不羈嘗曳裾徧歷燕齊吳楚所至名公巨卿莫不傾蓋延譽家藏懷素真蹟又蓄古琴二一日南風宋理宗宮中物一日綠綺臺唐武德年製後官中書舍人



蘇恭則樂昌人官廣西右參政廣西蠻地多反側恭則寬恤谿洞猺獠率從其訓後會師征交趾征南將軍韓觀好殺恭則諫止之全活甚衆人號為蘇佛子

鄧容字伯昂樂昌人正統中進士授永豐知縣邑有老樹藏妖時時出為民害又其縣分為四鄉有神靈謂之老佛四鄉迎祀之則無疾疫容皆為文籲天不移時迅雷破樹毀佛像後以討閩浙賊遇害賜諡恭毅子瑗球俱領鄉薦瑗最知名

鄧球字俊圭韶州樂昌人容次子成化舉人嘗遊白沙之門白沙贈詩曰忠臣有子堪傳後古道無人僅見君方伯吳公東湖稱以冰雪肝腸自號東川居士

鄧魯樂昌人字天質性孝友以歲貢授瑞州訓導俸薪悉均兄弟御史張公守約扁其弟曰樂道真儒

范漢字印泉英德人與弟潮以武畧聞萬厯中流賊行劫漢兄弟追至野猪灣殺百餘人救出被虜男婦數百援兵不及與弟皆陣亡南韶兵備道劉穩旌之日勇冠三軍

許士翹曲江人崇正中楚寇攻郡城士翹率衆輸金鑄無敵大砲安置各門禦之

王度字子中歸善人少力學工文辭用明經薦為山東道監察御史建文時燕兵起度悉心贊畫方孝孺與度書誓死社稷及燕王稱帝坐方黨誦成賀縣又坐語不遜族誅生平喜吟詠多所規諷皆不傳或記其詠橄欖曰南海飛騎薦荔枝誰知橄欖更清奇只因根託尋常地無自吹噓到帝畿

李亨字嘉會博羅人以春秋中永樂鄉試授四川珙縣教諭勤於講授撮春秋大旨為一編曰麟經管中豹復掇諸史之要



廣東通志卷四十一  
爲一編曰青史節要以便學者子容字思誠進士官山東布政入覲時天下官旌異者僅十人容與焉

郭觀歸善人正統舉人歷官浙江按察司僉事性整肅所至姦吏踴踏守官二十餘載清操不渝致仕歸家徒壁立解衣質米郡中稱廉士大夫以爲儀表

何宇新字子完博羅人性至孝父潛早卒母喪水漿不入口者七日負土成墳廬於墓側夜有虎蹲其門旣旦散去夜輒復至每浹旬則易二新者猶爪代然遂狎之若素參者嘗遊陳白沙之門白沙書卓行二字並遺以詩曰遶舍烏成陣終年虎卧門山梅初並蒂冬竹又生孫耿耿天公識明明國典存千秋何孝子不愧史官言宏治中舉於鄉官宗人府經歷

翟宗魯字一東博羅人補弟子員砥礪節行學師聖賢嘗設科

以誘進多士故一時學者遵教惟謹嘉靖中舉於鄉知融縣緩征輸節財用每日炳蕭告天而後聽訟片言立剖十二峒猺來寇諭以禍福頓首請爲編氓擇諸猺子弟稍慧者被之青衿鉦鼓導歸諸猺以爲寵剽掠用稀二府歎曰得一賢令勝百萬師信哉後乞歸卒年七十四

葉春芳字應元歸善人母鄒氏年十九而寡茹荼鞠之春芳幼穎悟及長受學於湛甘泉嘉靖中謁選授福建古田縣丞尋委署本邑所至民愛之若父母上司有訝其疏慢者厲聲曰豈不折腰人耶應聲曰兩峯山水當不嫌吾疏慢遂拂衣歸士民爲立去思碑

葉春及字化甫歸善人領嘉靖中鄉薦授福清教諭伏闕上書論時政一端治本二正士習三糾官邪四安民生五足國用



其目二十有五纒纒三萬餘言都下翕然謂劉蕢復出遷惠安令民愛之如慈父歌之曰葉君爲政惟飲吾水設施不煩五風十雨後爲忌者所中拂衣歸尋擢同知鄖陽府遷戶部郎中

胡世祥字光甫博羅人嘉靖中與葉春及同舉於鄉光甫以南曹郎歸卜築羅浮邑令鄧以誥曰吾兩人羅浮始得胡曙庵一面真今之古人也春及時亦以知州罷歸居石洞人稱羅浮二高

葉夢熊字男兆號龍潭歸善人春芳子少有膽略負大志嘉靖中進士知福清縣吏治尙嚴人不敢犯累官至甘肅巡撫代總督賜尙方劍討哱拜破之以功加兵部尙書卒著有詩文集運籌決勝等書

楊起元字貞復博羅人萬曆進士授翰林編修執贄羅近谿稟學焉往復參證大悟性命之宗曰乃今如客得歸矣累官侍讀學士母憂歸未嘗須臾忘近谿雕一小像出必告反必面歲時約同志祭奠於所居四方之士受學者屢常滿戶外卒賜祭葬謚文懿

黃讓字遜齋永安人少有大志喜讀書挾策學於莆田旣歸會兄爲賊所得罄私橐三百金贖之未幾賊葉千復掘讓父母塚質其骨責贖千金讓不能措乃以身自質賊易其親骨使從者懷歸其子啟愚啟魯聞之痛甚啟魯乃走賊壁曰質我歸父贖可得也賊遂歸讓讓獨行復爲他賊所執葉千見讓久不至乃以繩貫啟魯鼻倒懸之啟愚聞其事哭盡出血賊哀之卒歸其父與弟於是讓以策干大中丞吳桂芳曰歸善



之古名長樂之琴江其地扼塞多連岫沓嶂凶人之穴也不  
如遂縣之以安其民桂芳以為然遂上其事縣永安讓策也  
後啟愚啟魯俱以戰賊死讓年八十一卒旌曰一門三孝  
張萱字孟奇博羅人政熙長子萬厯中以春秋魁鄉試時與馮  
夢正諸名流結社賦詩往來莫逆官戶部郎中乞終養歸擢  
貴州平越守未任為蜚語所中乃為園榕溪之西不入城市  
海內稱為西園公生平無他嗜獨癖書藏萬卷著述尤多年  
八十四卒

韓日纘字緒仲博羅人魁南宮選庶吉士累官禮部尚書充經  
筵講官尋命教習館員條上館規六款曰端心術習啟沃敦  
素風正文體練經濟養器識奉旨褒嘉著為令未幾病卒謚  
文恪生平孝友立朝尤多大節逆璫勢方熾媚之者稱功頌

德纘淡然不屑也前後多所規畫悉中機宜如九連之置州  
平遠之置縣皆自纘發之

蘇福潮陽神泉人生有夙慧再歲而孤五歲不言一日見道旁

死蛙曰此出字也

謂蛙死仰腹形如出字

聞者驚異自是矢口成章下

筆若有神助嘗從母隴上與北山驛遇驛戲之曰拾穗與神  
童應之曰折梅逢驛使其警敏類此後舉赴京以年少令有  
司護還給月米所著有秋風辭紈扇行等篇八歲賦三十夜  
月詩人傳誦之

余真字景清潮陽人明習經術洪武中歲貢入國子監累試異  
等特授廣西道監察御史居官冰蘖自持人呼雪白御史後  
以言事觸忌諱謫官

李若林潮陽人宣德中進士授刑部主事每折獄務得其情尚



書輒嗟異以爲老吏不如也會疾告歸晚年詩文與同邑李  
齡相伯仲時稱二李

陳綱字文舉潮陽人官本省石城知縣遷慶遠同知有治才歲  
饑捐俸賑流亡家屬食竹實後卒於官

姚琛字宏璧潮陽人與從弟璵四世同居官順天府治中三月  
卽乞歸奉母年七十猶朝夕冠服聽教躬甘旨承歡鄉人多  
感化從弟璵字宏瓚領順天鄉薦授南京兵部司務紹字延  
述琛璵之從子成化進士官廣西參議有善政論者謂潮陽  
三姚能以經術節概世其家

翁理饒平人字存道成化中進士授興化推官時有鎮守太監  
入興携二白鶴頸上懸牌爲民犬嗾斃遂屬之理理判云鶴  
雖懸牌犬不識字禽獸相殘於人何事人服其不撓後終湖

### 廣刺史

周綸字希準海陽人宏治中進士授兵科給事中時劉瑾當國  
綸上疏列瑾逆狀度不免自刎死瑾見疏擲地曰鬼安得上  
書耶

鄭一初字朝朔揭陽人讀書紫陌山因號紫坡宏治中進士時  
劉瑾用事不謁選有鄉人緣事在囿以千金求爲居間曰名  
義至重鬼神難欺敢饒舌作說客耶瑾敗赴都授御史從王  
守仁講學日與橫山箬溪諸賢相質問得聖賢之旨以疾歸  
卒

薛侃字尙謙揭陽人性至孝正德進士以侍養歸師王守仁於  
贛州歸語兄俊俊大喜率子姪宗鑑等往學焉自是王氏學  
盛行於嶺南世宗立授行人聞守仁卒與歐陽德輩爲位朝



夕哭時方議文廟祀典侃上疏觸帝怒下獄廷鞠究交通主使者侃曰明有君父幽有鬼神頭可斷此心不可欺觀者嘖嘖以真鐵漢稱之乃斥為民歸至潞河遇聖壽節焚香叩祝或報參政項喬曰小舟中有民服而祝聖者喬曰必薛中離也跡之果然中離者侃自號也後講學羅浮從遊者百餘人卒年六十著有圖書質疑經傳論義等書

楊鸞字少默潮州人與兄驥從學於湛甘泉毅然有向往之志居家事母孝雍雍穆穆人皆敬信稱之曰雙鳳及卒甘泉慟之

翁萬達字仁夫揭陽人嘉靖中進士出為梧州知府咸宣侯仇鸞鎮兩廣縱部卒為虐萬達縛其尤橫者杖之聲績大著會朝議討安南擢萬達廣西副使辦安南事安南平授僉都御

史未幾議修大同西路宣府東路邊牆條十事上之帝悉報許乃請帑銀六十萬修之凡八百里牆堞遠近濠塹深廣曲盡其宜寇乃不敢輕犯萬達更事久帝深倚之所請無不從獨言俺答貢事與帝意左後以戰功進兵部尚書為仇鸞所構乞歸卒隆慶中追謚襄毅嘉靖中邊臣行事適機宜言中肯窾者萬達稱首所著有稽愆集平交紀略並詩文若干卷藏於家

袁鑑揭陽人字慶昭號衍江嘉靖中領鄉薦累官長蘆運同三與清廉宴未幾辭歸

吳子堅潮陽人嘉靖中為宣化教諭每升堂論學首嚴義利之辨嘗植松於東西齋日夕自灌以種樹為種心授學者以勿助勿忘之法後遷慶遠教授邕士建植松亭以識去思



唐伯元字仁卿澄海人萬厯中進士歷知萬年泰和二縣並有  
惠政民生祠之進郎中伯元受業永豐呂懷踐履篤實而深  
疾王守仁新說及守仁從祀文廟上疏爭之因請黜陸九淵  
而躋有若及周程張朱五子於十哲之列祀羅欽順章懋呂  
柟魏校呂懷蔡清羅洪先王艮於鄉疏方下部爲給事中所  
駁謫海州判官未幾屢遷尙寶司丞吏部尙書楊巍雅不喜  
守仁學心善伯元前疏用爲吏部郎中尋卒伯元清苦淡薄  
人所不堪甘之自如爲嶺海士大夫儀表所著有禮編易註  
太乙堂采芳亭諸稿

陳添桂海陽諸生莊涖之家僮也涖之家故饒隆慶間賊破東  
溝寨大索莊生莊闔門藏復壁中添桂被獲詰主人所在曰  
入郡矣賊怒害之涖之從複壁中備聞其語哭之慟葬以子  
姓禮歲時祭之

林孟森字永茂潮陽人能文章不樂仕進隱於壕墩號西湖靜  
隱以詩禮淑後進四世同居里中稱爲義門先生

葉正字夢吉高要人舉於鄉授潯州府同知調慶遠在任廉介  
導民以義兩廣猺賊蠶起將吏率縮胸觀望正募健兒趨赴  
遇賊鏖戰被數鎗與從子官慶皆死之嶺南素無雪是夜大  
雷電雪深尺許賊懼釋圍去

何貞字嵩山高明人三歲失怙恃喜讀書以父母不見爲恨遂  
絕意功名每食必慟終身衣縞食不兼味學者稱爲一味孝



子

李渭字長源鶴山人少未知學以戶役至縣為縣所辱乃發憤讀書不就卧榻者三年每夜倚牆而立以橐糶圍其足時搖颺以避蚊其刻苦如此遂通周易入郡學領成化中鄉薦時年四十矣又十年登進士任鳳陽府推官有妖僧崔同兒以邪術惑眾檣而杖之言笑自若以朱書其名於背始呼號乞哀乃杖斃仕終淮安同知

鄧崇德字子修高要人慷慨有氣節領正德鄉薦授沙縣知縣善決疑獄民稱神明嘗出白沙之門其卒也士民私謚古廉先生

莫如士字子元恩平人登嘉靖進士官監察御史性端直敢言時咸寧侯仇鸞通賊如士劾之鸞欲中以危禍會鸞病卒如

士又偕臺省諸臣追暴其罪上震怒命發鸞棺暴尸梟首傳示九邊如士直聲震海內遷大理寺丞理冤恤滯人以爲有于公風

區大相字用孺高明人爲文有奇氣援筆數千言萬歷中與兄大樞舉於鄉旋與弟大倫成進士授檢討居詞垣十五年調大僕寺丞移疾歸卒明季前後七子稱詩號翰林爲館閣體大相始力祛浮靡還之風雅陳言習氣爲之一變再奉剪桐命歷齊晉吳越高洛衡湘士風遺跡民瘼國計咸著篇詠館閣以來所未有也

陳思賢茂名人洪武末爲漳州教授以忠孝大義勗諸生燕王登極詔至慟哭曰明倫之義正在今日堅卧不迎詔率其徒吳性原陳應宗林珏鄒君默會廷瑞呂賢六人卽明倫堂爲



舊君位哭臨如禮有司執之送京師皆死之

陳珪字禹成化州人登嘉靖中進士擢刑部主事剛方明敏時嚴嵩當國珪絕不私謁嵩嫉之謫青州推官嵩敗起官至浙江布政所在有聲後忤當道歸御史扁其門曰藩臬清風著有羅江集

吳政電白人少有異才補弟子員以忠信式俗頑者化之時猗獮盤據雲廬大桂擄政索贖始不知爲政後詢之皆拜曰吾聞吳秀才善人也贈以金帛政辭所贈而求歸諸被擄者賊從之

黃環字伯循欽州人洪武中舉於鄉爲韓府教授致仕家居有雲雁下前池與家鵝遊息韓王思環教習之功屢遣使迎不赴因奇其事賜雁來池扁建坊於古渡口後遭變燼之

石孟全欽州人宣德間歲貢任海東知府歸至白鱗尾遇大風舟覆溺有巨鯉負其屍羣鯉夾之送如洪渡口衣冠面色如生子孫迎歸殮塋誓不食鯉因以知洪爲魚洪

耿寬合浦人嘉靖中舉人任江西大庾知縣端嚴寬大不假刑威中年解授浩然而歸人謂有五柳之風

鍾振字玉甫合浦人嘉靖中進士知滁州所行皆有效邑九龍灘水患頗劇振除之有岐麥並蓮靈鵲瑞竹之異擢守雲南以禮義廉恥爲規農桑勤儉爲務歸家手校邑乘巡道張國經賴以徵獻焉

梁調元欽州人年十二補弟子員治春秋督學袁茂英優禮之州守張應宿一見驚歎曰滄海遺珠也延爲上客

鄧鑑徐聞人永樂間由監生擢山西道監察御史秉公執法不



避權貴彈劾有聲卒祀鄉賢

洪彪遂溪人宏治中由歲貢任長汀縣丞清軍儲絕羨餘民有冰壺秋月之頌

賂廷用海康人闇然好修淡於聲利二次讓貢以冠帶自老不肯授官御史秦紘嘗造廬訪之悵然曰高士洵不可屈

陳時雍海康人性孝友領嘉靖中鄉薦操履儀度有先輩風時珠池太監趙蘭恣行剽取民苦之時雍具陳當路蘭竟奉旨革去弟時亨領廣西鄉薦生平與物無競鄉人有爭搆者輒相謂曰何不學時亨兄弟

莫天賦字子翼海康人賦性介直嘉靖中舉於鄉授莆田令擢南京刑部主事士民攀送者數百人後泗上孫謀爲令有善政民爲之謠曰昔有海康今有泗上其去而見思如此未幾

陞廣西右江道副使未任卒雷之士夫稱有學有守者必推

重天賦

何仕俊海康人隆慶間古田典史清操絕俗民稱爲河邊雁司監解之曰此官只飲水也

鍾世盛徐聞人性溫厚而課子弟最嚴雖元旦不令輟業四子各占一經俱成名四任博士清操如一士類慕之

鄧桓字子立徐聞人少負奇氣好古文居家孝友應貢入太學業成乃還孫會科第蟬聯爲徐邑望族

張善教瓊山人洪武中爲沙縣教諭學行粹潔士多感化歸建濱淪亭與趙謙王惠等遊吟爲一時盛事其在沙縣時所嘗行止處人以瓊臺瓊谷目之

王惠字仲迪瓊山人潔白清修毅然自立洪武中大臣薦至京



力辭歸自號霜筠天下高其節行

唐舟字汝濟瓊山人永樂中進士累官監察御史論事侃侃風節愈勁出按浙江所至多政譽及歸杜門不出家無擔石晏如也御手親授段子寶鈔賜羊酒米遣光祿寺送至家孫繼祖謝恩詩云內侍傳宣出建章東宮寮屬被恩光親勞御手分文錦又勅中官賜玉漿五品大夫名不忝萬年天子壽無疆小臣戀國心長在時望彤雲捧玉皇

吳錡瓊山人永樂進士字坦齋授義甯知縣加意學校士皆向之當時咸仰瓊為海外鄒魯

邱濬字仲深瓊山人祖普性為良醫樂善好施有陰德父傳早卒濬幼孤母李氏教之讀書過目成誦家貧無書嘗走百里借之舉鄉試第一景泰中成進士授編修濬既官翰林以經

濟自負兩廣用兵濬奏記大學士李賢指陳形勢纒纒數千言賢善其計聞之帝命錄示總兵官趙輔等破賊雖不盡用其策而濬以此名重公卿擢學士主南畿鄉試痛抑經生險怪之習累官文淵閣大學士卒謚文莊長子敦字一成有學行最知名季子京字峻成好施與有曾祖風

王佐字汝學號桐鄉瓊州臨高人正統中以禮經魁鄉薦授高州府同知諭降秦甯盜輿人頌其靖亂安民之績改同知臨江府輿人又頌其公平正大性質直不能隨時俯仰二十餘年一官不徙眾皆惜之致仕歸惟耽書史所著有雞肋集經籍目略世稱其文行年八十五卒

按別有一王佐南海人見前

王宏字孟遠海南衛後所人少孤力學以母老不仕開鄉塾訓子弟正統間大參龔璫都閩王清及致仕與御史唐舟輩遊



靈山分韻賦詩宏以布衣與列時人高之

裴崇禮字居敬崖州人景泰中舉於鄉積學能詩文有古趣嘗云瓊南文士獨讓王汝學出吾一頭餘子不足數也

唐胄字平侯瓊山人宏治中進士歷官北部左侍郎立朝有執持爲嶺南士人之冠

海瑞字汝賢一字國開瓊山人大父寬領鄉薦父瀚廩生瑞生而秀挺稍知識直欲學聖賢恥爲聲詩卽古今文詞要以闡發性靈而止不稟古則而自成一嘉靖中舉於鄉所對治黎策略曰天下之事圖之固貴有法而尤在於得人卽伏闕上平黎策不報未幾擢嘉興通判時世宗久不視朝深居西苑專意齋醮瑞上疏言詞剴切帝大怒抵之地顧左右曰執之無得遁宦官黃錦在側曰此人素有癡名聞其上疏時自

知觸忤當死市一棺待罪於朝是不遁也帝默然少頃復取讀之爲感動太息留中者數月會帝有疾不樂遂逮瑞下詔獄論死帝崩外庭多未知提牢主事聞狀以瑞且見用設酒饌歛之瑞自疑當付西市恣飲噉不顧主事附耳語曰宮車晏駕先生卽出大用矣瑞聞之大慟盡嘔出所飲食隕絕於地穆宗立累官至吏部右侍郎乞休不許卒於留都年七十餘無子僉都御史王用汲入視葛幃敝簾有寒士所不堪者因泣下醵金爲歛喪出江上白衣冠送者夾岸哭聲百里不絕縊忠介生平爲學以剛爲主自號剛峯天下稱剛峯先生王宏誨字紹傳定安人登嘉靖中進士授編修張居正用事作火樹篇春雪歌譏之歷官禮部尙書乞休歸

歐達勲西甯人萬曆舉人授膠州知州州北蝗災禱於神忽有



大鳥食蝗殆盡人以爲神

黎民望號及泉羅定人民敬之兄萬歷中歲薦以孝義著聞攝

景州篆德政甚著遷鎮甯州守其民有三不要四不忍之譽

卒祀鄉賢

黃文煜羅定人稟性純厚萬歷間任河南鄧州同知清白自守

簡靜不擾及致仕行李蕭然

岑永清西甯人操守清介天啟間選貢親喪躬荷畚鍤以營葬

事人稱其孝所居濱海颶風淫潦浮樯漂擊水中永清收之

悉爲改殯後子之豹成進士

何清字仁甫連州人景泰中舉於鄉累官懷慶府知府所至有

惠政惟性不能與時俯仰以事忤當道解組歸鑿池作園葛

巾野服日遊其間非公事不至州治

李邦義字宜之連州人兄邦仁同志砥礪邦仁頌嘉靖中鄉薦

邦義後亦舉於鄉登進士官太常少卿性方直人多忌之明

興連士登科甲者自邦義始

李孜字日孜保昌人博學多聞正統中舉於鄉授淮安教授善

於引導雅有高致性狷介負氣崖岸與人寡合然能克己處

物爲文典贍有法一時號爲博雅雖位止儒官而譽望特重

譚大初字宗元始興人嘉靖中進士授兵科給事中出爲江西

副使民有枉抑咸呼訴譚青天累官至戶部尚書卒年七十

五謚莊懿尚書馬森誌其墓稱其渥不可淄寵非能榮文獻

公後一人而已布政使陳善稱其清介足以勵頑凝重足以

鎮俗卓然有古大臣風

裴唐字肇虞保昌人性孝友萬歷中以貢謁選得安慶訓導兩



攝邑事以文學飾吏治嘗慕子游絃歌已而果補常熟教諭  
吳人宗之

陳亮長樂人字景明元儒生也明興洪永間累詔不出為小樓  
日儲玉購四方名書藏之又作草屋滄洲中與名士王恭高  
棟為文酒會暇則汎聞江歷名山意豁如也時時往還三山  
中立九老社以此自終

溫禧程鄉人洪武間以明經仕漢陽府訓導陳情乞終母養調  
本府儒學雖嚴冬盛暑衣冠侍母側無少怠學者稱為梅野  
先生

廣東考古輯要卷四十二

流寓

漢

吳祐字季英陳留人父恢南海太守祐年十二隨恢到官欲以  
殺青簡寫尚書章句祐諫曰今君踰江湖越五嶺僻在海濱  
風俗雖陋然多珍玩上為朝廷所疑下為權威所望此章句  
若成載必兼兩昔馬援以薏苡興謗王陽以衣囊微名嫌疑  
之戒願留意焉恢撫其首曰吳氏世不乏季子矣

劉熙字成國北海人博覽多識名重州黨建安中薦辟不就往  
來蒼梧南海客授生徒數百人作釋名二十七篇自為序又

著諡法三卷行於世案劉熙後漢書無傳惟見於三國志許  
慈薛綜程秉韋曜傳中而爵里無考隋  
青經籍志載劉熙釋名八卷諡法三卷云後漢安南太守劉  
熙注檢郡國志無安南郡漢陽郡注引秦州記云中平五年



分置南安郡安南或南安之誤也李石續博物志稱爲漢傳  
士劉熙書錄解題文獻通考俱云漢徵士北海劉熙字成國  
當是古本釋名所題如此然與隋書經籍志續博物志不同  
范書又以釋名爲劉珍撰吳志韋曜傳云見劉熙所作釋名  
作辯釋名曜與熙時代前後相去不遠其說可信劉珍所撰  
別一釋名耳然熙之事實言人人殊莫能是証尋釋許慈諸  
傳其避地至嶺表無可疑也此條見郭棻粵  
大記亦必本明以前舊志非漫然無稽之談

袁徽陳郡扶樂人渙從弟以儒素稱時天下將亂渙與徽間居  
從容謀避亂之地渙慨然嘆曰天下不靖逃將安之若天將  
喪道民以義存惟強而有禮可以庇身乎徽曰古人有言知  
幾其神見幾而作君子所以元吉也天下殺亂各行其所志  
乃避地至交州司徒辟不至

### 三國

程秉字德樞汝南南頓人逮事鄭康成後避亂交州與劉熙考  
論大義遂博通五經士變命爲長史權聞其名以禮徵之既

### 到拜太子太傅病卒官

許靖字文休汝南平輿人與從弟劭俱知名而私情不協劭爲  
郡功曹排擯靖不得齒叙以馬磨自給劉翊爲汝南太守乃  
舉靖孝廉除尚書郎典選舉董卓秉政周毖爲吏部尚書與  
靖共議謀進退天下之士拜韓馥爲冀州牧孔伷爲豫州刺  
史張邈爲陳留太守遷靖巴郡太守不就補御史中丞馥等  
到官舉兵誅卓卓怒毖曰諸君言當用善士從君計諸君所  
用人至官日還來相圖卓何用相負叱毖斬之靖懼誅奔伷  
伷卒依揚州刺史陳禕禕死吳郡都尉許貢會稽太守王朗  
與靖有舊故往保焉靖收恤親里經紀振贍孫策渡江皆走  
交州避難靖身坐岸邊先載附從疏親悉發乃從後去見者  
嘆息既至交趾太守士燮厚加敬待鉅鹿張翔銜王命使交



部乘勢募靖欲與誓要拒而不許後為劉璋招致入蜀為廣  
漢太守先主克蜀以靖為左將軍長史及即尊號策靖司徒  
章武二年卒

許慈字仁薦南陽人師事劉熙善鄭氏學治易尚書三禮毛詩  
論語建安中與許靖等俱自交州入蜀為博士後主世稍遷  
至大長秋卒

宋

王叔之臨沂人晉宋之際王室多艱叔之與兄伯之共將家口  
踰嶺依廣州刺史王鎮之愛羅浮之勝築室鳳凰洞之南携  
子弟讀書其中自稱處士庭植蘭菊作銘曰蘭既春敷菊又  
秋榮芳薰百草色豔羣英孰是芳質在幽愈馨朝斯夕斯願  
言永正其尚志類此世傳王生得仙至今王子洞猶存著集

十卷莊子義疏二卷

按隋書經籍志有莊子義疏三卷  
宋處士李叔之撰李疑王字之誤

梁

徐伯陽字隱忍東海人梁大同中為侯官令甚得人和侯景之  
亂至廣州依蕭勃勃平還都

袁敬字子恭陳郡陽夏人釋褐秘書郎累遷太子舍人洗馬中  
舍人江陵淪覆流寓嶺表高祖受禪敬在廣州依歐陽頎及  
頎卒其子紘據州將有異志敬切諫不從高宗即位遣章昭  
達率眾討紘紘將敗之時恨不納敬言朝廷義之徵為太子  
中庶子通直散騎常侍

岑之敬字思禮南陽棘陽人承聖二年除晉安王宣惠府中記  
室參軍時蕭勃據嶺表勅之敬宣旨慰喻會魏克江陵仍留  
廣州陳大建初還朝



謝曷貞族兄魏克江陵人長安曷逃難番禺貞母出家於宣明寺及陳武帝受禪曷還鄉里供養貞母將二十年

江總字總持濟南考城人年十八解褐惠武陵王府法曹參軍除丹陽尹何敬容府主簿遷尚書殿中郎太子洗馬出爲臨安令還爲中軍宣城王府限內錄事參軍轉太子中舍人侯景寇京師詔以總權兼太常卿守小廟臺城陷避難會稽總弟九舅蕭勃先據廣州又自會稽往依焉梁元帝平侯景徵爲明威將軍始興內史以郡秩米八百斛給總行裝會江陵陷遂不行自此流寓嶺南積歲天嘉四年以中書侍郎徵還直侍中省累遷司徒右長史

唐

杜審言襄州襄陽人進士爲隰城尉善五言詩工書翰然恃才

蹇傲爲時輩所嫉累轉洛陽丞坐事貶授吉州司戶參軍又與州僚不協司馬周季重與員外司戶郭若納共構審言罪狀繫獄將因事殺之旣而季重等府中酣讌審言子并年十三懷刃擊之季重中傷死而并亦爲左右所殺審言因此免官後則天召見審言拜著作郎俄遷膳部員外郎神龍初坐與張易之兄弟交往配流嶺外嘗寓南海遊白雲至亂山石賦詩久之入爲修文館學士卒贈著作郎

案審言配流嶺外見舊唐書杜易簡

傳新唐書及唐詩紀事俱作流峰州

王勃字子安絳州龍門人年未及冠應幽素舉及第授朝散郎爲沛王府修撰時諸王鬪鷄勃戲爲文檄英王鷄高宗曰是且交構斥出補虢州參軍官奴曹達犯罪勃匿之又懼事洩殺達以塞口事發當除會赦除名父福時以事左遷交趾令



唐書卷一百一十二  
勃往省上元一年將次交趾旅次南海後渡海溺水瘁而卒  
年二十九

孟雲卿河南平昌人少好學工詩第進士擢校書郎與杜甫元結相友善開元中南海督撫招之雲卿遊行結作詩送之謂魑魅鄉不可往雲卿堅于行結乃更爲序略云雲卿與次山同州里以辭學相友少次山六七歲聲名滿天下知已在朝廷及次山之年何事不可勿愛羅浮往而不歸也

劉言史不詳其鄉里與李賀同時有歌詩千首美麗恢贍自賀外世莫得比王武俊節制鎮冀一見極加異敬奏請官詔授棗強令辭疾不就世重之曰劉棗強乃旅遊南海怡情山水有贈北中親友及王園寺避暑諸詩廣人爭傳誦之

王博武許州人會昌中侍母至廣州及沙涌口暴風母溺死博

武自投於水嶺南節度使盧貞俾吏沈畱獲二屍焉乃葬之表其墓曰孝子墓詔爲刻石

李南隱字義山懷州河內人幼能爲文令狐楚鎮河陽以所業文干楚楚深禮之令與諸子遊楚鎮天平汴州從爲巡官歲給資裝令隨計上都開成二年登進士第釋褐秘書省校書郎調補宏農尉會昌二年又以書判拔萃王茂元鎮河陽辟爲掌書記得侍御史茂元愛其才以子妻之茂元雖讀書爲儒然本將家子李德裕素遇之時德裕秉政用爲河陽帥德裕與李宗閔楊嗣復令狐楚大相讐怨商隱旣爲茂元從事宗閔黨大薄之時令狐楚已卒子綯爲員外郎以商隱背恩尤惡其無行俄而茂元卒來遊京師久之不調會給事中鄭亞廉察廣州請爲觀察判官檢校水部員外郎大中初白敏



中執政合狐綯在內署共排李德裕逐之亞坐德裕黨貶循州刺史商隱隨亞在嶺表累載三年入朝補太學博士會河南尹柳仲郢鎮東蜀辟爲節度判官大中未仲郢坐專殺左遷商隱廢罷還鄭州未幾病卒

許渾睦州人字用晦大中三年任監察御史以疾乞東歸終郢睦二州刺史祇命南海至廬陵逢表兄軍倅奉使淮海別後卻寄云盧橘花香拂釣磯佳人猶舞越羅衣三洲水淺魚來少五嶺山高雁到稀客路晚依紅樹宿鄉關晴望白雲歸交親不念征南吏昨日風帆去似飛在廣州亦多題詠

實存亮長安人聞昌黎韓愈心切慕之貞元十九年愈以言事黜爲陽山令存亮裹糧從之事愈甚謹後有文名

元集虛河南人爲協律郎通三教之說南游廬山結亭五老峯

下白居易結廬其北甚愛敬之後從嶺南帥府辟南遊廣州韓愈贈以詩柳宗元作詩送之

楊衡字仲師吳興人初隱廬山工詩文與符載宋濟李象齊名嘗作詩送孔周之南海謁王尚書因先容得參幕府久寓嶺南爲節度使李復所重後官至大理評事以事忤後帥而去李羣玉字文山澧州人裴休觀察湖南厚延致之及爲相以詩論薦授校書郎好吹笙善急就章喜食鵝及授校書郎東歸盧肇送詩云妙吹應諧鳳工書定得鵝東歸遂遊嶺外入廣州訪五仙遺蹟往遊蒲澗復登羅浮皆有題詠房千里與馬使君俱貶端州羣玉有留別詩

李郢字楚望長安人博學工詩大中進士終於御史唐末避亂嶺表家廣州以詩自適子璵字魯珍生於南海尤能詩後登



甲科

陳陶字嵩伯一云鄱陽人昇元中南奔將求見烈祖自度不合

乃隱洪州西山自稱布衣開寶中人見之或云已得仙矣案

陶詩集中有海昌望月番禺道中諸作不下十數首考其流寓粵東當在唐末也

曹松字夢徵舒州人學賈司倉為詩累試不偶南遊廣州山水勝處必留連累日嘗至西樵栖遲久之教其民焙茶復至盧垵石谷問處士陳陶舊蹟作詩云直到南箕下方諸漲海頭君恩過桐柱戍節限交州犀占花陰卧波衝瘴色流遠夷非不樂自是北人愁人因改石為南基臺後北還舉進士天復初杜德祥主文放松及主希明劉象柯崇鄭希顏等及第年皆七十餘號五老榜時內難新平首求孤貧人德祥以松等塞詔各授校書郎制曰念爾登科之際當予反正之年宜降

異恩各膺寵命

宋

張愈字少愚益州郫人雋偉有大志屢舉不第寶元初上書言邊事請使契丹其論甚壯性喜山水遇有興雖數千里輒盡室往曾登廣州城樓題詩見人至拂其姓名而去

葛延之江陰人元符間自鄉縣不遠萬里省蘇公於儋耳公留之一月葛請作文之法誨之曰儋州雖數百家之聚而州人之所須取之市而足然不可徒得也必有一物以攝之然後為已用所謂一物者錢是也作文亦然天下之事散在經子史中不可徒使必得一物以攝之然後為已用所謂一物者意是也不得錢不可以取物不得意不可以用事此作文之要也葛拜其言而書諸紳



巢谷初名穀字元修眉州眉山人素多力見舉武藝者心好之  
聞西邊多驍勇去遊秦鳳涇原間所至友其秀桀蘇軾謫黃  
州與谷同鄉幼而識之因與之遊及軾與弟轍在朝谷浮沈  
里中未嘗一來相見紹聖初軾轍謫嶺海親舊無復相聞者  
谷慨然自眉山誦言欲徒步訪兩蘇聞者笑其狂元符二年  
谷竟往至梅州遺轍書曰我萬里步行見公不意自全今至  
梅矣不旬日必見死無恨矣轍驚喜曰此非今世人古之人  
也既見握手相泣已而道平生逾月不厭時谷年七十三瘦  
瘠多病將復見軾於海南轍愍而止之曰君意則善然循至  
儋數千里當復渡海非老人事也谷曰我自視未卽死公無  
止我乃強資遣之再行會有蠻隸竊其橐裝以逃獲於新城  
谷從之至新遂病死轍聞哭之失聲恨不用已言而致死又

奇其不用已言而行其志也

蘇過字叔黨蘇軾子軾知杭州過年十九以詩賦解兩浙路禮  
部試下及軾爲兵部尚書在右承務郎軾帥定武謫知英州  
遷儋耳漸徙廉永獨過侍之凡生理晝夜寒暑所須者一身  
百爲不知其難初至海上爲文曰志隱軾覽之曰吾可以安  
於島夷矣因命作孔子弟子別傳軾卒於常州過葬軾於汝  
州郟城小峨眉山遂家穎昌自號斜川居士時稱爲小坡其  
叔轍每稱過孝以訓宗族且言吾兄遠居海上惟成就此兒  
能文也

陳顯字德明固始人元豐中進士歷戶部尚書政和二年因召  
對力言再用蔡京士民失望帝怒貶知越州遂隱於四明五  
年召超爲宣和殿學士辭不就靖康之亂避地南海因家焉



陳好初名豪晉江人曾受業於楊時後在太學與陳東上書留李綱及東被誅遂變名遊瓊州家於蒼原今子孫繁盛

陳與義字去非洛陽人政和中進士累遷符寶郎謫監陳留酒稅金人入汴避亂襄漢轉踰嶺嶠寓廣州登海山樓題詠而去紹興元年艤舟康州與學士耿伯順賦詩先是有龍圖學士梁端者靖康間亦避地康州遊憩山水亦多賦詩然不及與義也陳獻章酷好其詩

朱敦儒字希真河南人志行高潔有朝野之望高宗卽位詔求草澤才德之士淮西部使者言敦儒有文武才名之敦儒辭避亂客南雄州張浚奏赴軍前計議弗起紹興二年宣諭使明橐言敦儒深達治體廷臣亦多稱其靖退詔以爲右迪功郎下肇慶府敦遣詣行在敦儒不肯受詔其故人勸之今天

子側席幽士翼宣中興譙定召於蜀蘇庠召於浙張自牧召於長蘆莫不聲流天京風動郡國君何爲棲茅茹藿白首巖谷乎敦儒始起既至命對便殿論議明暢上悅賜進士出身爲秘書省正字俄兼兵部郎官遷兩浙東路提點刑獄會右諫議大夫汪勃劾敦儒專立異論與李光交通敦儒遂罷

陳知柔字體仁福州永春人紹興十二年進士授台州判官歷知賀州初與秦檜子熺同榜者多致通顯知柔獨不附雅好山水罷賀州歸留惠三年暇日泛豐湖登白鶴峯追和東坡詩陶寫羅浮風物殆盡

洪适字景伯皓長子也皓使朔方适年十三能任家事以皓出使恩補修職郎紹興十二年與弟遵同中博學宏詞科高宗曰父在遠方子能自立此忠義報也宜升擢遂除勅令所刪



定官後三年弟邁亦中是選由是二洪文名滿天下改秘書省正字甫數月皓歸忤秦檜出知饒州适亦出爲台州通判垂滿皓謫英州适復論罷往來嶺南省侍者九載檜死皓還道卒服闋知荆門軍

梁克家字叔子泉州晉江人幼聰敏絕人書過目成誦有郭姓者作四會簿尉克家嘗館焉紹興二十八年九月潮州揭陽縣治東壩梅花盛開嶺外梅花固早於江浙然亦須至冬乃有之邑人以爲異士子賦詩皆詔令尹時克家正爲館客爲此齋亦賦一篇有九鼎燮調端有待百花羞慙敢言芳之句明年還泉州解試第一又明年遂魁天下致位上宰

李孟博莊簡光之子也苦學有文紹興五年進士第莊簡南遷隨侍至貶所遂卒於瓊州未卒數月忽夢至一處海上空濶

樓觀特起有軒榜曰空明諸父環坐其間顧指其一曰留以待汝旣悟知其非祥也未幾遂屬疾臨終有雲氣起於寢冠服宛然自雲中冉冉升舉瓊人悉見之

張栻字敬夫丞相浚子穎悟夙成長師胡宏稱之栻益自奮勵以古聖賢自期紹興乙丑浚因上疏秦檜大怒令中丞何若劾之以特進提舉江州太平興國宮連州居住栻隨侍至連州浚爲書院于嘉魚池之左栻亦開書堂以講學以廕補官辟宣撫司都督府書寫機宜文字除直秘閣孝宗新卽位浚起謫籍開府治戎參佐皆極一時之選栻時以少年內贊密謀外參庶務其所綜畫幕府諸人皆自以爲不及也在湖湘時廣州學者多從之遊稱爲南軒先生淳祐初封華陽伯從祀孔子廟



秦綱建康人性武健有膽略所為詩文多悲壯慷慨嘗出邊徼與諸將校遊習知塞上險要復挾輿圖遊京師以策干當事無所遇獨與寶謨閣學士劉克莊善時莆田方信儒使北議和克莊薦綱與俱後嘉定中信孺守韶郡綱亦從焉赤水洞賊為亂信孺募土兵命綱將而討之深入谿峒士卒多云去乃揮戈奮前與賊格鬪而死郡人哀之祀於韶之光孝寺

朱熹字元晦婺源人嘗遊揭陽飛泉嶺寓鄭進士家覽勝亭書落漢鳴泉四大字揭諸亭

文應麟吉州人丞相文天祥諸孫侗黨尚志節景定中丞相弟壁守惠州應麟與之偕屢勸壁修城堞建樓櫓積芻蕘糧儲以嚴守備壁易其言及元兵至竟以城降應麟耻之携二子起南遁於東莞之東渚遂家焉今其子孫日蕃為名族

元

虞集字伯生宋丞相允文五世孫父汲娶楊氏國子祭酒文仲女咸淳間生集三歲即知讀書歲乙亥汲挈家趨嶺外干戈中無書冊可携楊氏口授論語孟子左氏傳歐蘇文聞輒成誦比還長沙就外傅始得刻本則已盡讀諸經通其大義矣大德初以大臣薦授大都路儒學教授至正八年五月卒官自將仕郎十二轉為通奉大夫贈江西行中書省參知政事護軍封仁壽郡公

黃從簡筠州人黃憲昭之子入廣留家南海以保障功官至宣慰副使

明

鄭定字孟宣好擊劍為陳友定記室及敗浮海入交廣間久之



還居長樂洪武末累官至國子助教

楊升字起宗永嘉人洪武間寓瓊三十餘年通春秋善屬文當路撰述多出其手舉臨高校官後以老謝政與郡守王伯正善嘗改瓊海方輿志文行冠一時

徐益字咨益豐城人洪武間從父戍瓊博通經史尤長詩賦爲鄉校師尚書薛遠輩皆出其門與王霜筠楊行素朱四吟等相友善王霜筠有詠史詩行世益嘗爲之校正云

胡廣字光大吉水人父壽昌以薦除御史擢遷廣西憲左遷至彭州終延平知府廣八歲而孤洪武中嘗至廣州濠畔殖貨不廢經史廣士多與之交庚辰舉進士第一御筆改名靖永樂初復舊名入內閣累官翰林學士兼左春坊大學士進文淵閣大學士廣人舊識至京師相見輒禮待以是多稱其厚

卒贈少師諡文穆

吳均字平仲臨川人朱繼字伯紹莆田人鄭觀字尚寶三山人洪武未俱寓瓊州從學於趙考古俱擢高第

梁良玉定海人官中書舍人建文亡變姓名走海南鬻書以老李承基字世卿嘉魚人成化乙酉舉於鄉宏治元年至新會從陳獻章獻章築楚雲臺居之所爲詩文特清拔吳廷舉延修順德志後歸卜築黃公山遂不復出

陳茂烈字時周莆田人宏治八年舉進士奉使廣東受業陳獻章之門獻章語以主靜之學退而與張詡論難作靜思錄尋授吉安府推官

莊維春閩人年十三時父官瓊州維春往省之將抵海陬作詩曰十里至海路已絕四面無村人獨行百夢不能一到此雙



親猶自隔蓬瀛後官至豫章太守

方瓘婺源人與同里洪垣往從湛若水若水爲建二妙樓居之  
絕意仕進嘗自廣東還同行友瘴死舟中例不載屍瓘秘不  
以告與同寢累日至韶州始發之







